

熊 能
褻 能
慙 能
天 驥

熊 能
囊 襄
愍 愍

天驥

熊襄愍公書牘序

明主萬歷以後，遼事日亟矣。當時稱邊才者，首推熊襄愍。襄愍兩任經略，皆力持守議。其始則開原、鎮嶺已陷，故議守遼陽。後則遼瀋相繼淪亡，又議守廣寧。使當日廟堂主謀者能用其議，假以事權，竭公之才志以經營之，故地之能遠謀規，夏雖未可知，而必不可慎固吾圉。何至一敗再敗，藩籬盡撤，關以外竟無片土哉！夫惟國是不定，浮議盈廷，任以事而不授以權，陽責以立功，而寔陰掣其肘。至其甚則借封疆爲門戶之爭，而使小人得因是而興大獄，而公不幸身丁其厄。至於身死名裂，君子觀於遼事之敗，亡未嘗不太息痛恨於當日言路之糾紛，大臣之嫉忌，有以致之，而重爲公惜者也。或謂公之再出也，亦既深知事局之日危，而已議又爲部臣柄兵者所不與，則何必鹵莽而輕於受任，以自危其身。及既受任矣，則當同心戮力，共濟時艱，而內與本兵結怨，外與撫臣搆隙，口舌恣見，忿爭無已時，坐使事機決裂，而不可收拾。又豈大臣公忠體國所爲者。嗚呼！公負才負氣人也，負才則不肯無所試，故寧擲其身於危難之地而不能耐。

日之閑。負氣則不甘。有所屈。故寧以其身爲萬矢的。而必伸一己之見。使公稍引身避。事抑或俯仰。時豈不身名俱泰。然此又豈勞臣烈士之本志哉。故公之陳屍都市。謗滿天下。固所不恤。所最痛恨者。負不世之才。遭事機之會。而隲于奸庸之手。不克竟其志。以此難瞑目矣。世所傳公之書牘。僅百餘首。皆經略遼東時所與人者。其辦事之困苦。疑謗之交迫。皆略見於此。公嘗言。日日與人。以口舌相爭。然事勢有不得不爭。且欲以揀死。然死不能揀。則公之所處。豈不大可憐哉。予嘗謂公之才畧志量。與近世左文襄公相似。左公以功名終。而公身殲志屈。則所遇有幸不幸也。潘博

熊襄愍公明史本傳

熊廷弼字飛百。江夏人。萬曆二十五年。舉鄉試第一。明年成進士。授保定推官。擢御史。三十六年。巡按遼東。巡撫趙楫。與總兵官李成梁。棄寬奠新疆八百里。徙編民六萬家於內地。已論功受賞。給事中宋一韓論之。下廷弼覆勘。具得棄地驅民狀。劾兩人罪。及先任按臣何爾健康。丕揚黨庇。疏竟不下。時有詔興屯。廷弼言遼多曠土。歲於額軍八萬中。以三分屯種。可得粟百三十萬石。帝優詔褒美。命推行於諸邊。邊將好搗巢。輒生費端。廷弼言防邊以守爲上。繕垣建堡。有十五利。奏行之。歲大旱。廷弼行部金州。禱城隍神。約七日雨。不雨毀其廟。及至廣寧。踰三日。大書白牌。封劍使使往斬之。未至風雷大作。雨如注。遼人以爲神。在遼數年。杜餽遺。核軍實。按劾將吏。不事姑息。風紀大振。督學南畿。嚴明有聲。以杖死諸生事。與巡按御史荆養喬相訐奏。養喬投劾去。廷弼亦聽勘歸。四十七年。楊鎬旣喪師。廷議以廷弼熟邊事。起大理寺丞。兼河南道御史。宣慰遼東。旋擢兵部右侍郎。兼右僉都御史。代鎬經略。未出京。開原失。廷弼上言。遼左京師肩

背。河東遼鎮腹心。開原又河東根本。欲保遼東。則開原必不可棄。敵未破開原時。北關朝鮮。猶足爲腹背患。今已破開原。北關不敢不服。遣一介使朝鮮。不敢不從。旣無腹背憂。必合東西之勢以交攻。然則遼瀋何可守也。乞速遣將士。備芻糧。修器械。毋窘臣用。毋緩臣期。母中格以沮臣氣。毋旁撓以掣臣肘。毋獨遣臣以艱危。以致誤臣。誤遼兼誤國也。疏入。悉報允。且賜尙方劍。重其權。甫出關。鐵嶺復失。瀋陽及諸城堡軍民。一時盡竄。遼陽洶洶。廷弼兼程進。遇逃者。諭令歸。斬逃將劉遇節。王捷。王文鼎。以祭死節士。誅貪將陳倫。劾罷總兵官李如楨。以李懷信代督軍士。造戰車。治火器。濬濠繕城。爲守禦計。令嚴法行。數月。守備大固。乃上方略。請集兵十八萬。分布驪陽。清河。撫順。柴河。三岔兒。鎮江諸要口。首尾相應。小警自爲堵禦。大敵互爲應援。更挑精悍者爲遊徼。乘間掠零騎。擾耕牧。更番迭出。使敵疲於奔命。然後相機進剿。疏入。帝從之。廷弼之初抵遼也。令僉事韓原善。往撫瀋陽。憚不肯行。繼命僉事閻鳴泰。至虎皮驛。慟哭而返。廷弼乃躬自巡歷。自虎皮驛抵瀋陽。復乘雪夜赴撫順。總兵賀世賢以近敵沮之。廷弼曰。冰雪滿地。敵不料我來。鼓吹入。時兵燹後。數百里無人跡。廷弼祭諸死事者而哭之。遂耀兵奉

集。相度形勢而還。所至招流移。繕守具。分置士馬。由是人心復固。廷弼身長七尺。有膽知兵。善左右射。自按遼。卽持守邊議。至是主守禦益堅。然性剛負氣。好謾罵。不爲人下。物情以故不甚附。明年五月。我大清兵略地花嶺。六月。略王大人屯。八月。略蒲河。將士失亡七百餘人。諸將世賢等。亦有斬獲功。而給事中姚宗文。騰謗於朝。廷弼遂不安其位。宗文者。故戶科給事中。丁憂歸。還朝欲補官。而吏部題請諸疏。率數年不下。宗文患之。假招徠西部名。屬當事薦已。疏屢上不得命。宗文計窮。致書廷弼。令代請。廷弼不從。宗文由是怨。後夤緣復吏科。閱視遼東士馬。與廷弼議多不合。遼東人劉國縉。先爲御史。坐大計謫官。遼事起。廷議川遼人。遂以兵部主事。贊畫軍務。國縉主募遼人爲兵。所募萬七千餘人。逃亡過半。廷弼聞於朝。國縉亦怨。廷弼爲御史時。與國縉宗文同在言路。意氣相得。並以排東林。攻道學爲事。國縉輩以故意望廷弼。廷弼不能如前。益相失。宗文故出國縉門下。兩人益相比。而傾廷弼。及宗文歸。疏陳遼土日蹙。詆廷弼廢羣策而雄獨智。且曰。軍馬不訓練。將領不部署。人心不親附。刑威有時窮。工作無時止。復鼓其同類攻擊。欲必去之。御史顧慥首劾廷弼。出關踰年。漫無定畫。蒲河失守。匿不上。

聞荷戈之士。徒供挑澹。尙方之劍。違志作威。當是時光宗崩。熹宗初立。朝端方多事。而封疆議起。御史馮三元劾廷弼無謀者八。欺君者三。謂不罷。遼必不保。詔下廷議。廷弼憤抗。疏極辨。且求罷。而御史張修德復劾其破壞遼陽。廷弼益憤。再疏自明云。遼已轉危爲安。臣且之生致死。遂繳還尙方劍。力求罷斥。給事中魏應嘉復劾之。朝議允廷弼去。以袁應泰代。廷弼乃上疏求勘。言遼師覆沒。臣始驅羸卒數千。跟跲出關。至杏山而鐵嶺又失。廷臣咸謂遼必亡。而今且地方安堵。舉朝帖席。此非不操練不部署者所能致也。若謂擁兵十萬。不能斬將禽王。誠臣之罪。然求此於今日。亦豈易言。令箭催而張帥殞命。馬上催而三路喪師。臣何敢復蹈前軌。三元應嘉修德等復連章極論廷弼。即請三人往勘。帝從之。御史吳應奇給事中楊漣等力言不可。乃改命兵科給事中朱董蒙往。廷弼復上疏曰。臣蒙恩回籍聽勘。行矣。但臺省責臣以破壞之遼。遣他人。臣不得不一一陳之於上。今朝堂議論。全不知兵。冬春之際。敵以冰雪稍緩。鬩然言師老財匱。馬上促戰。及軍敗始愀然不敢復言。比臣收拾甫定。而愀然者又復鬩然責戰矣。自有遼難以來。用武將。用文吏。何非臺省所建白。何嘗有一效。疆場事當聽疆場吏自爲之。

何用拾帖括語。徒亂人意。一不從。輒怫然怒。及童蒙還奏。備陳廷弼功狀。末言臣入遼時。士民垂泣而道。謂數十萬生靈。皆廷弼一人所留。其罪何可輕議。獨是廷弼受知最深。蒲河之役。敵攻瀋陽。策馬趨救。何其壯也。及見官兵驚弱。遽爾乞骸以歸。將置君恩何地。廷弼功在存遼。微勞雖有可紀。罪在負君。大義實無所逃。此則罪浮於功者矣。帝以廷弼力保危城。仍議起用。天啓元年。瀋陽破。應泰死。廷臣復思廷弼。給事中郭鞏力詆之。并及閣臣劉一燝。及遼陽破。河西軍民盡奔。自塔山至闔陽二百餘里。煙火斷絕。京師大震。一燝曰。使廷弼在遼。當不至此。御史江秉謙。追言廷弼保守危遼。兼以排擠勞臣爲鞏罪。帝乃治前劾廷弼者。貶三元。修德。應嘉。鞏三秩。除宗文名。御史劉廷宣救之。亦被斥。乃復詔起廷弼於家。而擢王化貞爲巡撫。化貞諸城人。萬歷四十一年。進士。由戶部主事。歷右參議。分守廣寧。蒙古炒花諸部長。乘機窺塞下。化貞撫之。皆不敢動。朱童蒙勸事還。極言化貞得西人心。勿輕調禦撫事。化貞亦言遼事將壞。惟發帑金百萬。亟款西人。則敵顧忌不敢深入。會遼瀋相繼亡。廷議將起廷弼。御史方震孺。請加化貞秩。便宜從事。令與薛國用同守河西。乃進化貞右僉都御史。巡撫廣寧。廣寧城

在山隈。登山可俯瞰城內。恃三岔河爲阻。而三岔之黃泥窪。又水淺可涉。廣寧止扉卒千。化貞招集散亡。復得萬餘人。激厲士民。聯絡西部。人心稍定。遼陽初失。遠近震驚。謂河西必不能保。化貞提弱卒。守孤城。氣不攝。時望赫然。中朝亦謂其才足倚。悉以河西事付之。而化貞又以登萊天津兵可不設。諸鎮入衛兵可止。當事益信其有才。所奏請輒報可。時金復諸衛軍民。及東山礦徒。多結砦自固。以待官軍。其逃入朝鮮者。亦不下二萬。化貞請鼓舞諸人。優以爵祿。俾自奮於功名。詔諭朝鮮。褒以忠義。勉之同仇。帝亦從之。至六月。廷弼入朝。首請免言官貶謫。帝不可。乃建三方布置策。廣寧用馬步。列壘河上。以形勢格之。綴敵全力。天津登萊。各置舟師。乘虛入南衛。動搖其人心。敵必內顧。而遼陽可復。於是登萊議設巡撫如天津。以陶朗先爲之。而山海特設經略。節制三方。一事權。遂進廷弼兵部尙書。兼右副都御史。駐山海關。經略遼東軍務。廷弼因請尙方劍。請調兵二十餘萬。以兵馬芻糧器械之屬。責成戶兵工三部。白監軍道臣高出胡嘉棟。督餉郎中傅國無罪。請復官任事。議用遼人。故贊畫主事劉國縉。爲登萊招練副使。夔州同知佟卜年。爲登萊監軍僉事。故臨洮推官洪敷教。爲職方主事。軍前贊畫。用收

拾遼人心。並報允。七月。廷弼將啓行。帝特賜麒麟服一。彩幣四。宴之郊外。命文武大臣陪餞。異數也。又以京營選鋒五千。護廷弼行。先是。袁應泰死。薛國用代爲經略。病不任事。化貞乃部署諸將。沿河設六營。營置參將一人。守備二人。晝地分守。西平鎮武柳河。盤山諸要害。各置戍設防。議旣上。廷弼不謂然。疏言。河窄難恃。堡小難容。今日但宜固守廣寧。若駐兵河上。兵分則力弱。敵輕騎潛渡。直攻一營。力必不支。一營潰則諸營俱潰。西平諸戍。亦不能守。河上止宜置遊徼兵。更番出入。示敵不測。不宜屯聚一處。爲敵所乘。自河抵廣寧。止宜多置烽墩。西平諸處。止宜稍置戍兵。爲傳烽哨探之用。而大兵悉聚廣寧。相度城外形勢。犄角立營。深壘高柵。以俟。蓋遼陽去廣寧三百六十里。非敵騎一日能到。有聲息。我必預知。斷不宜分兵防河。先爲自弱之計也。疏上。優旨褒答。會御史方震孺。亦言防河六不足恃。議乃寢。而化貞以計不行。愠甚。盡委軍事於廷弼。廷弼乃請申諭化貞。不得藉口節制。坐失事機。先是。四方援遼之師。化貞悉改爲平遼。遼人多不悅。廷弼言。遼人未叛。乞改爲平東。或征東。以慰其心。自是化貞與廷弼有隙。而經撫不和之議起矣。八月朔。廷弼言。三方建置。須聯絡朝鮮。請亟發救使。往勞彼國君。

臣。俾盡發八道之師。連營江上。助我聲勢。又發詔書。憫恤遼人之避難彼國者。招集團練。別爲一軍。與朝鮮軍合勢。而我使臣。卽權駐義州。控制聯絡。俾與登萊聲息相通。於事有濟。更宜發銀六萬兩。分犒朝鮮及遼人。而臣給與空名劄付百道。俾承制拜除。其東山礦徒。能結聚千人者。卽署都司。五百人者。署守備。將一呼立應。而一二萬勁兵。可立致也。因薦監軍副將梁之垣。生長海濱。習朝鮮事。可充命使。帝立從之。且命如行人奉使故事。賜一品服以寵其行。之垣乃列上重事。權定職掌八事。帝亦報可。之垣方與所司議兵餉。而化貞所遣都司毛文龍。已襲取鎮江。奏捷。舉朝大喜。亟命登萊天津。發水師二萬應文龍。化貞督廣寧兵四萬。進據河上。合蒙古軍。乘機進取。而廷弼居中節制。命旣下。經撫各鎮互觀望。兵不果進。頃之化貞備陳東西情形。言敵棄遼陽不守。河東失陷。將士日夜望官軍至。卽執敵將以降。而西部虎墩兔炒花。咸願助兵。敵兵守河州。不過二千。河上止遼卒三千。若潛師夜襲。勢在必克。敵南防者聞而北歸。我據險以擊其惰。可盡也。兵部尙書張鶴鳴以爲然。奏言時不可失。御史徐卿伯復趣之。請令廷弼進駐廣寧。薊遼總督王象乾。移鎮山海。會化貞復馳奏。敵因官軍收復鎮江。遂驅掠

四衛屯民。屯民據鐵山死守。傷敵三四千人。敵圍之益急。急宜赴救。於是兵部愈促進師。化貞卽以是月渡河。廷弼不得已出關。次右屯。而馳奏海州取易守難。不宜輕舉。化貞卒無功而還。化貞爲人驤而慎。素不習兵。輕視大敵。好謾語。文武將吏進諫。悉不入。與廷弼尤牴牾。妄意降敵者李永芳爲內應。信西部言。謂虎墩兔助兵四十萬。遂欲以不戰取全勝。一切士馬甲仗。糗糧營壘。俱置不問。務爲大言罔中朝。尙書鶴鳴深信之。所請無不允。以故廷弼不得行其志。廣寧有兵十四萬。而廷弼關上無一卒。徒擁經畧虛號而已。延綏入衛。兵不堪用。廷弼請罪其帥杜文煥。鶴鳴議寬之。廷弼請用卜年。鶴鳴上駁議。廷弼奏遣之。坦。鶴鳴故穢其餉。兩人遂相怨。事事齟齬。而廷弼亦褊淺剛愎。有觸必發。盛氣相加。朝士多厭惡之。毛文龍鎮江之捷。化貞自謂發蹤奇功。廷弼言三方兵力未集。文龍發之太早。致敵恨遼人。屠戮四衛軍民殆盡。灰東山之心。寒朝鮮之膽。奪河西之氣。亂三方並進之謀。誤屬國聯絡之算。日爲奇功。乃奇禍耳。貽書京師。力詆化貞。朝士方以鎮江爲奇捷。聞其言亦多不服。廷弼又顯詆鶴鳴。謂臣旣任經畧。四方援軍。宜聽臣調遣。乃鶴鳴徑自發戍。不令臣知。七月中。臣咨部問調軍之數。經今兩

月。置不答。臣有經略名。無其實。遼左事惟樞臣與撫臣共爲之。鶴鳴益恨。至九月。化貞猶言虎墩兔兵四十萬。且至。請速濟師。廷弼言。撫臣恃西部。欲以不戰爲戰。計西部與我進不同進。彼入北道。我入南道。相距二百餘里。敵分兵來應。亦須我自撐拒。臣未敢輕視敵人。謂可不戰勝也。臣初議三方布置。必使兵馬器械。舟車芻茭。無一不備。而後尅期齊舉。進足戰。退亦足以守。今臨事中亂。雖樞臣主謀於中。撫臣決策於外。卜一舉成功。而臣猶有萬一不必然之慮也。旣而西部竟不至。化貞兵亦不敢進。廷弼旣與化貞隙。中朝右化貞者。多詆廷弼。給事中楊道寅。謂出嘉棟不宜用。御史徐景濂。極譽化貞。刺廷弼。詆之。但逍遙故鄉。不稱任使。御史蘇琰。則言廷弼宜駐廣寧。不當遠駐山海。因言登萊水師無所用。廷弼怒。抗疏力詆三人。帝皆無所問。而帝於講筵。忽問卜年係叛族。何擢僉事。國縉數經論列。何起用。嘉棟立功贖罪。何在天津。廷弼知左右譖之。抗疏辨。語頗憤激。是時廷弼主守。謂遼人不可用。西部不可恃。永芳不可信。廣寧多間諜。可虞。化貞一切反之。絕口不言守。謂我一渡河。河東人必內應。且騰書中朝。言仲秋之月。可高枕而聽捷音。識者知其必僨事。以疆場事重。無敢言其短者。至十月。冰合。廣寧

人謂 大清兵必渡河。紛然思竄。化貞乃與震孺計。分兵守鎮武、西平、閩陽、鎮寧諸城堡。而以大軍守廣寧。鶴鳴亦以廣寧可慮。請敕廷弼出關。廷弼上言。樞臣第知經畧一出。足鎮人心。不知徒手之經畧一出。其動搖人心更甚。且臣駐廣寧。化貞駐何地。鶴鳴責經撫協心同力。而樞臣與經臣。獨不當協心同力乎。爲今日計。惟樞部俯同於臣。臣始得爲陛下任東方事也。其言甚切至。鶴鳴益不悅。廷弼乃復出關。至右屯。議以重兵內護廣寧。外扼鎮武、閩陽。乃令劉渠以二萬人守鍾武。祁秉忠以萬人守閩陽。又令羅一貫以三千人守西平。復申令曰。敵來越鎮武一步者。文武將吏誅無赦。敵至廣寧。而鎮武、閩陽不夾攻。掠右屯、餉道。而三路不救援者。亦如之。部署甫定。化貞又信諜者言。遽發兵襲海州。旋亦引退。廷弼乃上言撫臣之進。及今而五矣。八九月間。屢進屢止。猶未有疏請也。若十月二十五日之役。則拜疏輒行者也。臣疾趨出關。而撫臣歸矣。西平之會。相與協心議守。犄角設營。而進兵之書。又以晦日至矣。撫臣以十一月二日赴鎮武。臣即以次日赴杜家屯。北至中途。而軍馬又遣還矣。初五日。撫臣又欲以輕兵襲牛莊。奪馬圈守之。爲明年進兵門戶。時馬圈無一敵兵。即得牛莊。我不能守。敵何損。我何

益。會將吏力持不可。撫臣亦怏怏回矣。兵屢進屢退。敵已窺盡伎倆。而臣之虛名。亦以輕出而損。願陛下明諭撫臣。慎重舉止。毋爲敵人所笑。化貞見疏不悅。馳奏辨。且曰。願請兵六萬。一舉蕩平。臣不敢貪天功。但厚資從征將士。遼民賜復十年。海內得免加派。臣願足矣。即有不稱。亦必殺傷相當。敵不復振。保不爲河西憂。因請便宜行事。時葉向高復當國。化貞座主也。頗右之。廷臣惟太僕少卿何喬遠。言宜專守廣寧。御史夏之令。言蒙古不可信。款賞無益。給事中趙時用。言永芳必不可信。與廷弼合。餘多右化貞。令毋受廷弼節制。而給事中李精白。欲授化貞尙方劍。得便宜操縱。孫杰劾一燿以用出嘉棟。卜年爲罪。而言廷弼不宜駐關內。廷弼憤。上言臣以東西南北所欲殺之人。而適遣事。機難處之。會諸臣能爲封疆容則容之。不能爲門戶容則去之。何必內借閣部。外借撫道以相困。又言經撫不和。恃有言官。言官交攻。恃有樞部。樞部佐鬪。恃有閣臣。臣今無望矣。帝以兩臣爭言。遣兵部堂官。及給事中各一人往諭。抗違不遵者治罪。命既下。廷臣言遣官不便。乃下廷臣集議。初廷弼之出關也。化貞慮奪已兵權。伴以兵事委廷弼。廷弼上言。臣奉命控扼山海。非廣寧所得私。撫臣不宜卸責於臣。會震孺奏經撫


不和。中有化貞。心慵意懶。語廷弼。據以刺化貞。化貞益不悅。及化貞請一舉蕩平。廷弼乃言。宜如撫臣約。亟罷臣以鼓士氣。當是時。中外舉知經撫不和。必誤疆事。章日上。而鶴鳴篤信化貞。遂欲去廷弼。二年正月。員外郎徐大化。希指劾廷弼。大言。罩世嫉能。妬功。不去必壞遼事。疏并下部。鶴鳴乃集廷臣大議。議撤廷弼者數人。餘多請分任責成。鶴鳴獨言。化貞一去。毛文龍必不用命。遼人爲兵者必潰。西部必解體。宜賜化貞尙方劍。專委以廣寧。而撤廷弼他用。議上。帝不從。責吏兵二部再奏。會大清兵逼西平。遂罷議。仍兼任二臣。責以功罪一體。無何西平圍急。化貞信中軍孫得功計。盡發廣寧兵。畀得功及祖大壽。往會秉忠進戰。廷弼亦馳檄渠撤營赴援。二十二日。遇大清兵平陽橋。鋒始交。得功及參將鮑承先等先奔。鎮武閭陽兵遂大潰。渠秉忠戰沒沙嶺。大壽走覺華島。西平守將一貫。待援不至。與參將黑雲鶴亦戰歿。廷弼已離右屯。次閭陽。參議邢慎言勸急救廣寧。爲僉事韓初命所沮。遂退還。時大清兵頓沙嶺不進。化貞素任得功爲腹心。而得功潛降於大清。欲生縛化貞以爲功。訛言敵已薄城。城中大亂奔走。叅政高邦佐禁之。不能止。化貞方闔署理軍書。不知也。參將江朝棟排闥入。化貞

怒而之。朝棟大呼曰：「事急矣！請公速走。」化貞莫知所爲。朝棟掖之出上馬。二僕人徒步從。遂棄廣寧。踉蹌走。與廷弼遇大凌河。化貞哭。廷弼微笑曰：「六萬衆一舉蕩平。竟何如？」化貞慙。議守寧遠及前屯。廷弼曰：「嘻！已晚。惟護潰民入關可耳。」乃以己所將五千人。授化貞爲殿。盡焚積聚。二十六日。偕初命護潰民入關。化貞出。嘉棟先後入。獨邦佐自經死。得功率廣寧叛將。迎大清兵入廣寧。化貞逃已兩日矣。大清兵追逐化貞等二百里。不得食。乃還。報至京師。大震。鶴鳴恐。自請視師。二月。逮化貞。罷廷弼聽勸。四月。刑部尙書王紀、左都御史鄒元標、大理寺卿周應秋等。奏上獄詞。廷弼、化貞並論死。後當行刑。廷弼令汪文言賄內廷四萬金。祈緩。既而背之。魏忠賢大恨。誓速斬廷弼。及楊漣等下獄。譴以受廷弼賄。甚其罪。已選者獲。市人蔣應暘。謂與廷弼子出入禁獄。陰謀匡測。忠賢愈欲速殺廷弼。其黨門克新、郭興治、石三畏、卓邁等。遂希指趣之。會馮銓亦憾廷弼。與順乘謙等侍譚筵。出市刊遼東傳。譖於帝曰：「此廷弼所作。希脫罪耳。」帝怒。遂以五年八月棄市。傳首九邊。已御史梁夢環。謂廷弼侵盜軍資十七萬。御史劉徵。謂廷弼家資百萬。宜藉以佐軍。忠賢即矯旨嚴追。罄貲不足。姻族家俱破。江夏知縣王爾玉。責

廷弼子貂裘珍玩不獲。將撻之。其長子兆珪自剄死。兆珪母稱冤。爾玉去其兩婢衣。撻之四十。遠近莫不嗟憤。崇禎元年。詔免追贓。其秋工部主事徐爾一。訟廷弼冤曰。廷弼以失陷封疆。主傳首陳屍。籍產追贓。而臣考當年。第覺其罪無足據。而勞有足矜也。廣寧兵十三萬。糧數百萬。盡屬化貞。廷弼止援遼兵五千人。駐右屯。距廣寧四十里耳。化貞忽同三四百萬遼民。一時盡潰。廷弼五千人不同潰足矣。尙望其屹然堅壁哉。廷弼罪安在。化貞仗西部。廷弼云必不足仗。化貞信李永芳內附。廷弼云必不足信。無一事不力爭。無一言不奇中。廷弼罪安在。且屢疏爭各鎮節制不行。屢疏爭原派兵馬不與。徒擁虛器。抱空名。廷弼罪安在。唐郭子儀李光弼。與九節度師同潰。自應收潰兵。扼河陽橋。無再往河陽。坐待思明縛去之理。今計廣寧。西止關上一門限。不趣扼關門何待。史稱慕容垂一軍。三萬獨全。亦無再駐淝水。與晉人決戰之理。廷弼能令五千人不散。至大凌河。付與化貞。事政相類。寧得與化貞同日道乎。所謂勞有足矜者。當三路同時陷沒。開鐵北關相繼奔潰。廷弼經理不及一年。俄進築集瀋陽。俄進屯虎皮驛。俄迎扼敵兵於橫河上。於遼陽城下。鑿河列柵埋礮。屹然樹金湯。令得竟所施。何至舉榆口。

關外拱手授人。而今俱抹撥不論。乃其所由必死。則有故矣。其才既籠蓋一時。其氣又陵厲一世。揭辯紛紛。致撓衆怒。共起殺機。是則所由必殺其軀之道耳。當廷弼被劾被逮之時。天日輒爲無光。足明其冤。乞賜昭雪。爲勞臣勸。不從。明年五月。大學士韓爌等言。廷弼遺骸。至今不得歸葬。從來國法所未有。今其子疏請歸葬。臣等擬稟許之。蓋國典皇仁。並行不悖。理合如此。若廷弼罪狀始末。亦有可言。皇祖朝戊申己酉間。廷弼以御史按遼東。早以遼患爲慮。請核地界。飭營伍。聯絡南北關。大聲疾呼。人莫爲應。十年而驗若左券。其可言者一。戊午己未。楊鎬三路喪師。撫順清河陷沒。皇祖用楊鶴言。召起廷弼代鎬。一年餘。修飭守具。邊患稍寧。會皇祖賓天。廷議以廷弼無戰功。攻使去。使袁應泰代。四閱月而遼亡。使廷弼在。未必至此。其可言者二。遼陽旣失。先帝思廷弼言。再起之田間。復任經略。化貞主戰。廷弼主守。羣議皆是化貞。廷弼屢言。玩師必敗。奸細當防。莫有聽者。徘徊躑躅。以五千人駐右屯。化貞兵十三萬駐廣寧。廣寧潰。右屯乃與俱潰。其可言者三。假令廷弼於此時。死守右屯。捐軀殉封疆。豈非節烈奇男子。不然。支撐寧前錦義間。扶傷救敗。收拾殘黎。猶可圖桑榆之效。乃倉皇風鶴。偕化貞並馬入關。

其意以我固嘗言之。言而不聽。罪當未減。此則私心短見。殺身以此。殺身而無辭。公論亦以此。傳首邊庭。頭足異處。亦足爲臨難鮮忠者之戒矣。然使誅廷弼者。按封疆失陷之條。偕同事諸臣。一體伏法。廷弼九原目瞑。乃先以賄贓。拷坐楊漣。魏大中等。作清流陷阱。既而刊書惑衆。借題曲殺。身死尙懸坐贓十七萬。辱及妻孥。長子兆珪。迫極自刎。斯則廷弼死未心服。海內忠臣義士。亦多憤惋竊歎者。特以封疆二字。噤不敢訟。陳皇之上。前。臣等平心論之。自有遼事以來。詎官營私者何算。廷弼不取一金錢。不通一饋問。焦唇敝舌。爭言大計。魏忠賢盜竊威福。士大夫靡然從風。廷弼以長鬚待決之人。屈曲則生。抗違則死。乃終不改其強直自遂之性。致獨膺顯戮。慷慨赴市。耿耿剛腸。猶未盡泯。今縱不敢深言。而傳首已踰三年。收葬原無禁例。聖明必當垂仁。臣所以媿媿及此者。以茲事雖屬封疆。而實陰繫朝中邪正本末。皇上天縱英哲。或不以臣等爲大謬也。詔許其子持首歸葬。五年。化貞始伏誅。



熊襄愍公書牘

明 熊廷弼 著

請馮三元等會勘揭

從來台省有糾彈之責。惜情面必誤人家國。有風力乃足別賢奸。但不可捕風捉影。以莫須有定人罪案。更不可結黨聯私。交相排擠。污人名節。不肖亦曾忝列科道。從未敢作信口雌黃也。日來見馮道長疏。要將臣逮下法司。莫令奸臣脫網。張道長疏。要用尙方與王忬楊守謙並論。魏掌科疏。又舉出一樁逆案。極不可解之罪。要逮至闕廷。如楊鎬例。意其急急除奸問罪。一得往遼會勘之旨。必朝聞命夕就道。不俟駕行矣。臣恐淹留關外。爲人口實。急望山海驅發。以便三公出關行事。及見兵科公疏。又要收回成命。爲之留行。其若三公除奸問罪之意何。策其留行大旨。謂勘者卽言者。就令勘得逼真。臣心不服。其實不然。原告被告。例聽堂上處分。臣以封疆大臣。自作被告。聽勘於三公之原告者。誠降心以從也。假使三公專主勘得。恐行胸臆。高下其手。葛藤或不得已。今同勘者有經略巡撫按。有部道府廳。有總兵諸將軍民。審一人有一人口詞。勘一處有

一處結狀。經一官有一官勸語。俱當一一奏聞。三公不得增減一字也。即與撫按會稿具覆。撫按內憑本心。外憑輿論。亦不肯以地方徇三公。聽其輕舉筆也。誠如是。其偏真也。敢不服。敢不相下。臣意氣雖頽。經營久定。即東方挾衆。溷處撫順。而藩奉諸將。自能應禦。無可憂也。七八九十月分最緊急。過此至十一月十二月。水凍枯冷。是其緩時。道將精神。儘能照管。若謂臣之功罪爲小。封疆之關係爲大。則繆矣。使功罪而無關於封疆也。焉用勸。正惟關係封疆。勸而是。戰守有所持循。勸而非。當事亟圖改正。勸而功。則寬臣以安衆。勸而罪。則處臣以警衆。如分功罪封疆爲兩。是欲明臣於封疆外也。或謂臣實勞顯績彰。在地方中無可勸者。勸而無所得以歸。甚不便。故三公不敢來。然而來固無妨也。昧心違公論以徇科道。計承勸者不得爲稍作調停語。以存科道體。亦或所不免。況言官有風聞言事之例。即說謊欺君。誣善害賢。有此四字護身。當今之時。誰敢向兩衙門問妄言之罪。而又何縮縮於來勸之一行哉。揭此爲三公勸駕。

乞早賜處分揭

謹揭。頃見李任寰道長有經臣全非同心。又露妬口。伏乞聖明早賜處分。以明專一之

事權。以救孤危之封疆。一疏。中間論職謀據中樞。謀據關上。及妬陷撫臺諸狀。自有公論。不足辯。獨其引易曰。近而不相得則凶。語曰。一淵不兩蛟。一棲不兩雄。今以不相得之人。處共淵共棲之地。既不能以同心。必不能以共事。曰。化貞無廣寧。得釋擔頭之苦。於化貞何損。廣寧無化貞。或少撐持之助。而禍將不可測。此明白斬截之確論也。今日之事。當以撫臺與其同鄉同年之議論爲主。六萬進戰。一舉蕩平。而且預以厚賚。復租除餉。願與主上約。此事何等擔任。廣寧無撫臺。禍即不測。此是何等決斷。人已勇任。而偏不許任。人已明斷。而偏不肯斷。必欲捏合以成廣寧不測之禍。亦獨何與。既已奉旨下部確議。望張鳳老明白斬截。將職處分。俾撫臺事權。早得專一。仍寄語廟堂諸老曰。巡撫近日事事皆秘密。獨行一切。城中邊上事情。俱戒各官勿報經略知。而職豈惟不相干之人。且爲極相妨之人矣。謹揭。

遣各道先入關放軍民揭

謹揭。頃見中路監軍道韓初命以先入關被逮。及查初命等先入關之故。則職實使之。職二十四日在塔山道中。見軍民車輛爭擁排集。行走不通。誠恐關上監放無人。止開

一關。耽擱留阻。致有它變。因從馬上手書諭帖。傳邢韓高胡牛五道。及同知羅任李居簡等。星馳入關。分投正關南水關北水關三路開放。今諭帖不知何道收存。未繳查也。時馬強者先抵關先入。馬乏者後抵關後入。如牛道與羅同知等無馬而拄棍步行者。職命文卷車子載牛道。命家丁步行讓馬與羅任騎而始入關。故最後入。然皆以是日同入。特有上晝下晝之分耳。特與巡撫爭七十里之近耳。此入關先後之故。非可以此而定逃之先後也。若必以逃之先後論。則有巡撫之逃。然後有部司道府之逃。有廣寧院道處近閭陽跟蹤奔命之逃。然後有閭陽經略與韓胡兩道整隊護民之逃。有未見東兵而忽然開城放民。開獄放囚。傳令箭放軍士。可以無走之逃。然後有十萬既奔。五千何能站立。軍民既去。經略何從救援。而不得不行之逃。論者不揣其本而齊其末。又不問何以先入之故。而第曰先入關者應斬也。應逮也。是惡足爲定論哉。至於韓繼高胡之後。而獨得逮者。又不在入關之先後。蓋別自有故。而職不必言也。此揭。

辨王帖雲疏揭

謹揭。職初入關。具疏認罪。即蒙旨不必瀆奏。業知廟堂有喜聞撫瀆而不喜經瀆之意。

遂於臺省諸疏。不復置一詞。惟昨見王帖雲。公祖有科臣黨奸悞國之疏。竊謂奸之一字。加之於職。尙欠恰當。願以職之生平平心。再一推敲之。王公祖以十餘萬之士馬。數百萬之錢糧。專奉一巡撫以主戰。乃兵一交而卽潰。壘未對而先逃。十萬之衆。一日俱盡。而欲職以五千風聲鶴唳之餘。往代淫奔婦而守其空房。其將能乎。大凌河駐兵一日。交付巡撫。然後忙趨山海。以定逃軍流民之亂。誠自度關上彈壓。非職不可。如避淫奔之嫌。不以兵付巡撫。而從容殿後。豈不自爲甚善。然數萬餓軍。守候三日。洵洵欲變。若關上一亂。禍且難言。職雖奸。不忍爲也。善哉王公祖之疏也。兵不足。餉不敷。器械不給。則臣之誤也。兵足矣。餉敷矣。器械給矣。委而棄之者何人。非臣之悞也。則非臣之罪也。職亦學作一轉語曰。兵足於經略。餉敷於經略。器械給於經略。委而棄之。則職之悞也。不與經畧一兵一餉一器械。非職之悞也。則非職之罪也。王公祖以爲如何。至謂經撫僞爲不利以圖卸擔。而掩失封疆之罪。則僞爲二字。亦只可以欺庸人。而不可以欺當世之豪傑。得無穿鑿太甚耶。今王公祖亦以經略往矣。職行事奸與不奸。罪與無罪。到彼當自知之。可不必言。惟願以封疆爲重。無因勢處騎虎。必遂其謀。而使朝廷他日

不得如漢家存一陳湯猶能扶病決機也。此揭。

六

諭諸將

年來官軍屢戰屢敗。皆將官紀律不嚴。各軍平日不知有軍法。所以臨陣亦不知有將官。見兵輒逃。實由於此。前已申明臨陣退縮之令。許把總斬各兵。千總斬把總。將官斬中千。總兵斬各將。總兵不用命者。有上方劍在。而卒未見著實舉行者。我知之矣。凡將官。必與士卒同飲食。共甘苦。然後士卒感戴而不忍不用命。必自己守清廉。戒貪冒。然後士卒畏服而不敢不用命。今將官平日待下無恩。處己多穢。而後往往爲軍士所挾制。其何法之能行。此病根也。諸君其洗心滌腸。爲我一改之。

諭總兵將官

昨至教場。各營兵丁弓多歪折。箭無鏃羽。刀鎗頑鈍。棍棒輕細。撒袋鞍轡。俱各朽爛。更有借人弓箭。搪塞應點者。不知該管將領所幹何事。諸君其爲我嚴督軍兵。一一整備。弓要勁。箭要直。鏃要鋼。翎要全。刀鎗要鋒利。火器要熟慣。棍棒要沉重。撒袋鞍轡皮條等項。俱要堅緻。每兵撒袋要貯箭三四十枝。一裝一件。星夜完備。聽候不日親閱。臨期

有一不堪者。本兵同千把隊長一體細打。該將另議。勿謂我不戒視成而不以先告也。特諭。

諭李永芳

昔我按遼時。愛汝驍勇善射。賜汝良馬。薦汝前列。望汝登壇拜將報我知己。何意時乖願違。竟至今日。可惜可嘆。且以汝之才。如汝之志。豈甘心降人者。或欲乘機違會。爲所欲爲。亦未可知。人言攻陷開鐵。汝在領兵。定無回意。以我思之。汝既身在邊地。安得不爾。且用汝領兵。正是使汝與故鄉結恨。不敢復歸之意。我豈不諒。然而今雖用汝。能保其不疑汝乎。無功既疑汝不爲他用。有功又疑汝將來難制。鼾睡之側。誰能容汝。縱今日容汝。而白頭舉事。人壽幾何。將來諸子能容汝乎。此亦不可不籌也。汝若思前想後。相機行事。實心歸順。立功贖罪。我當以百口保汝一死。且當用汝。加汝世職。若食此言。天日鑒之。我與汝說三個古人降的故事。一關雲長降曹。及報効曹公。遂歸先主。汝既報効。可歸矣。汝當學雲長。一朱序降苻堅。後從堅伐晉。兩軍方交。而序從堅陣中呼曰。軍敗矣。堅陣動大敗。而序遂歸晉。汝若誘之來攻。從陣呼敗先奔。而使我追之。亦一奇

也。汝當學朱序。一李陵降匈奴。見漢。殺其母妻。終不歸漢。然終身不隨匈奴侵漢。如不肯歸。當學李陵。我本汝之恩師。願汝學雲長朱序。不願汝學李陵。嗟呼。十年之前。我爲汝恩師。十年之後。汝爲我仇敵。汝忍乎。不忍乎。正寫諭帖差人間。忽武靖營送到汝家人李得才。說汝遣他探聽。果是我來。欲要如此如此。是汝尙感我而不忘也。今將諭帖密付得才與汝。汝可反覆思想。如果汝家人說話出汝真意。可卽決意圖之。汝曉邊外情形地勢。我定用汝引兵進征。速成此功。封拜之事。汝尙有望。此轉禍爲福時也。仍遣得才速回我話。以慰我望。汝是假話哄我。亦任汝爲之。汝不聞俺答縛送趙全之故事乎。邊外兵力地形。我所久知。大兵一集。立見困蹙。東將送汝以解說。汝悔晚矣。汝其清夜思我良言。此諭。

諭各總兵將官

凡軍士必有一副能殺人的。軀幹本事。忍殺人的。心膽而後。可以出戰立功。非柔脆遊猾者所得而辨也。年來諸將貓鼠同眠。不肯選汰。各衙門因襲故常。又不行選汰。以此兵不堪用。喪師辱國。一敗而不可復振。近奉明旨。謂新舊兵多老弱。責備各官。設法稽

查。已經通行去後。而及今並無一報者。日挨一日。月挨一月。不審諸公上之何以立功。次之何以免罪。此事何時結局。此身何年入關。思前想後。實切憂懼。夫挑選之法。全在看其精神軀幹。年力技藝數項。而別爲等第。以酌去留。一等充頭敵。二等備接應。三等固城守。劉老營。前牌論之詳矣。諸將粗選而送之該部。該部覆選而送之該道。該道加選而送之經畧。月餘可辦。不難完事也。不佞每想做一事做一牌。賠費如許心血。而諸將如風過耳。竟不細看來文。而著實行之。豈謂此一樁事又被我等延挨過去而遂足自快耶。行得著實。卽爲功臣。行不著實。卽爲亡俘。只此兩路。皆在諸將自己身上結果。請諸將自擇之。

與三鎮守議事諭

一東是一個人主張。一張口說話。一條心算計。今三鎮是三個人主張。三張口說話。三條心算計。你要東。我要西。你要前。我要後。甚於軍中不便。須是同心合意。虛懷下氣。將三個人說話主張算計。聯將上來。只當一個人一般。全無一毫彼此參差之意。方可同謀并力以拒邊。若分一毫你我。各行各事。各執各見。不行會同。不相照管。不但是封疆

之患。尤三鎮自己之患也。試看前面杜鎮諸帥情意如何。後來光景如何。豈不深爲鑒戒。一二三鎮不必以遼陽爲慮。但堅主一心。同謀合力。在虎皮關一帶要路。聯絡割營。如品字樣。互爲犄角。與之相持。勿輕戰。若來衝營。止用火器打退。如其閃退。誘我出兵追趕。我亦勿輕追趕。如此三鎮人馬自能站住。三鎮既能站住。必不能越三鎮來攻遼城。縱攻遼城。劉總兵率守城兵射打於城上。我身披甲上馬。督楊總兵人馬及川土各兵拒戰於城下。東兵必不能奈我何。三鎮不必回救遼陽。但各整精兵。星夜脚枚。疾趨撫順。搗其新寨。東兵聞知。必捨遼陽奔回。自救。我率遼陽人馬驅之於後。三鎮人馬阻之於前。東必慌亂。取勝必矣。如不越過。見衝不動。三四日間。必定回去。三鎮則徐徐多張旗幟。亟擂金鼓以尾之。恐有勁兵斷後。亦不必逼之太急。或又恐其以兵牽制三鎮。不得動。而從別路來攻遼陽。我亦不懼。自有前法拒守。萬萬可保無虞。三鎮亦任其牽制。不必奔回也。一二三鎮雖在虎皮三塊石一帶割住。不許輕動。亦須會同。各遣好將好兵。漸漸前向撫順聯絡不絕。而三鎮自家撥夜。却須直抵撫順城。東哨探與之時。會面。仍不時移窩以防東來撲捉。必如此則前面一路。俱有人馬。一可以壯三鎮之前茅。一

可以明三鎮之耳目。一可以使人不測。三鎮之多寡進退。而急於自防。不暇攻我。若只靜坐虎皮一帶。以待其來。有何好處。一東兵如來到虎皮衝營。能有幾多兵馬。一齊并衝。三鎮必定聚衆。專衝一營。則兩鎮作何救援。此不可不預商量也。鄙意三鎮立營。須如品字樣。今西至武靖。東至三塊石。乃一條鞭。不知於救援便否。此亦不可不預商量也。若兵齊衝三營。則其力分矣。此不必慮也。一前所議俱是按營不動。算兵來衝的法子。萬一相遇於平原曠野之下。則三鎮人馬。誰爲正兵。誰爲奇兵。誰爲前鋒。誰爲中權。誰爲左右翼。誰迎誰誘。誰埋伏橫擊。或更番迭戰。或三道并進。必須三鎮合并。如一營模樣。然後可如身之使臂。臂之使指。而無所不可。此一節要虛心商量。一料東兵斷不急來遼陽。只惟瀋陽可慮。三鎮不必慮遼陽。只爲我算計援瀋存瀋守瀋之策。如於四月內果攻瀋陽。三鎮作何救援。誰戰於城下。誰斷其歸路。誰引兵趨撫順。聲言搗之。以牽其回顧。一應方略。不可不預先商量停當。以免臨時慌亂。如不來攻。今且權用何法。收拾城上城下城內城外一應守具事宜。總之兵不來一日。我當做一日事。不得錯過也。一東之捕探撥夜及零掠入我撫順城南過河至塔山舖前山臺一帶來。若不設法

砍他幾個。必輕我如入無人之境。不但邊之耳目得明。我之耳目反暗。而且益張我之怯懦。以益逞其攻打之念。此雖小事。所關甚大。然亦三鎮須自己算計。隨便圖之。我亦不主意。定要三鎮幹此事也。一凡事。要預先拿定主意。硬定脚跟。壯定膽氣。主意定。便不惑。錯。脚跟定。便不忙。亂。膽氣定。便不怯。懼。主帥不惑。錯。則兵將自不惑。錯。主帥不忙。亂。則兵將自不忙。亂。主帥不怯。懼。則兵將自不怯。懼。而又刻刻念。提舉精神。朝乾夕惕。時見邊於對面之間。醒開眼目。遠值的探。時見邊於數百千里之外。人馬無日不撫慰。器械無件不看驗。防備無處不周詳。賞罰無施不停當。三鎮誠肯如此體貼行去。何憂戰之不勝。功之不立哉。第一要拿定主意。則脚跟自硬。膽氣自壯。精神自提。眼目自開。我已拿定自守遼陽主意。其防守一應事體。惟三鎮自定主意。隨宜行之。一軍中機宜。聽三鎮便宜。從事。我一毫不爲中制。凡有可徑行者。只管行去。亦不必請示後行。軍機變態。間不容髮。若必請示。便耽誤了大事。今來劄內亦止是二三大綱所在。至於細細曲折。見景生情。全在臨時機便。我難遙度。其未盡事宜。有鄙見寫不及見不到者。望一一與兩監軍道細細商量見教。以慰我切切之望。

諭張都司

修城挑濠。是遼人自己家當。該遼人自己收拾。况四方官兵萬里而來者。且盡數掇泥掇土。爲遼城做工。豈有遼人反不自己做工之理。况今日做工之壯士。即前日編派守城之壯士也。登城日子尙有時度。單家獨戶。猶不失誤生意。今日日做工。向誰尋食。養其父母及其妻子。不佞甚憫念之。欲要將前壯士分別誰貧誰富。誰有力。誰無力。誰當長做。誰當短做。誰肯拿出天理良心。說我有力。說我不貧。都司掌印捕盜官。誰肯拿出天理良心。從公從實。派富寬貧。派有力。寬無力。徒爲勢力人家。了却一番人情。而不行分別。則單家獨戶貧而無力者。實是苦楚。不過該士其將前編壯士冊子禱告城隍。從公從實。分別殷實有力上戶若干。中戶若干。照常做工外。其無力者五日一次。無力而孤寡殘疾者。徑行豁免。若官生衙門富勢人役。囑脫賄免者。請於城隍亟極之。仍許貧無力者。首出一名即頂一。而且罰其家財。以爲犒工之費。何如。

與本兵黃嘉善書

頃見老先生辨楊掌科疏。謂以積怯之勢。當破竹之師。及經略以寬政而實本兵於顯

罰。笑老先生善推一誤字也。雖然不誤有不佞之累贖在。姑舉一二以相質。記去年十一月有部調紙上有兵出關無兵一疏。內言兵部尙書黃嘉善等不肯爲皇上拚死力爭上緊幹辦。使皇上獨當大禍不已。此時卽按丁汝夔等故事。盡戮諸臣。亦何補於成敗之數。蓋責老先生之誤也。今年正月。有明旨催兵愈嚴中外虛應如故疏。請旨考成兵部。內有仍乞天語丁囑樞臣曰。前三路失師之後。假如催兵出關。張揚聲勢。則開鐵可保無虞。乃視邊臣呼號漠然不應。旣已自形敗露。連陷重城。始令帶罪視事。若此番調遣。仍不如數。不又限。致有失陷。兩罪俱發。定有祖宗朝處治本兵之法在。蓋依責老先生之誤也。夫各邊巡撫。仰鼻息於中樞。苟非老先生誤事至極。誰敢輕引丁公事例相加。而覽疏撫心。亦可以思矣。若夫闔外之事。自有不佞調度。豈老先生所能制。但從來經略節制諸鎮。一應兵馬錢糧。將調發如意。今獨節制河西招募班兵馬萬數千人。應往河東者。亦不便調。而至山海關以內。卽不能行一步。曾以節制事屢求老先生。又不以實應。催之急。又喇喇口角曰。不能。闔外之事。實爲老先生制。實由老先生誤。有好兵將好器械湊手應用。何至今日。而猶得至有今日之光景者。臣何敢多遜。不然而老

先生之寘於顯罰久矣。倖遣三路之罪。貽逾歲之安。不經臣是德。而反弄機巧。扯人以自卸。豈老先生之誤事被劾。因不佞而始有耶。且所謂及於寬政者。謂其人原應嚴譴。而姑從曲赦之謂也。不佞之罪安在。而煩人寬議。近日本部差來張李兩主政。身親目擊。老先生既誤人事。又終年俛留。倏入倏出。而戀戀求寬爲也。有王太保瓊在樞中。而後新都得立功於闔外。不佞之遇老先生。命也。尙何言哉。

與李寧遠書

君侯處北海。僕處南海。風馬牛不相及也。祇緣朝命來按茲土。得與君家周旋。自江疏一覆。而吾事畢矣。是故君侯子孫鹽糧扞禁者。但取充倉而不苛求捐資助工者。至今感德而不忘報。不肖若如梧如楠輩。逐之處之。而不以國法貸賢。若効忠懷忠輩。愛之護之。而不以浮說搖。非故有時擊時舍於其間也。王路本自寬平。吾心從來正大。固無容狹且私焉。云爾。獨於妄功冒罪一節。不能無感焉。一門子姓。盡肘圭玉。則五侯七貴之風也。九族親朋。咸纏組綬。則許史金張之屬也。守錢虜而坐號冠軍。則銅山金穴之遺也。厮養兒而橫拖金紫。則爛羊竈下之類也。語云。惟名與器。不可假人。苟不帝制而

王自爲。則人臣而戮力疆場。亦自恒事。何致舉天王爵人予人之事。而濫以爲市者。此自古英雄豪傑。樹功伐於一時。流景耀於千秋者。不乏人矣。無暇遠引。即如我國家開國元勳。如徐常湯鄧諸公。佐高皇帝開天闢地。建萬世不拔之基。其視今日邊功何如者。乃夷考封建之制。自正爵外而餘蔭有幾。此君侯之所明也。假令當日元勳。亦皆如今所爲。則徐常湯鄧諸子孫。印纍纍而綬若若者。豈不以千萬計。而濠滁泗壽間。所爲親戚僕御商賈之類。又豈不家指揮而人千百戶耶。君侯起家海徼。致位通侯。其當年撻伐之功。赫赫一時。僕雖不得目擊其盛。然竊覽君侯任內所造核冊。歷院題奏稿。及眼前城郭人民之狀。亦略窺其餘。槩以君侯之功之如此。而大拜而爵。朝廷報君侯之功之如彼。既已遠出徐常諸公上。而又濫予親戚僕役商賈之類。則何不以向者元勳居功之道自待。且各家世世享受無恙。而獨以虛名歸之君侯。實禍貽之子孫。又何不工於自謀之甚也。往年侯闔垣胡直指亦會疏革冒功人員二百七十餘名。不過十之二三爾。其後胡以獲罪。侯立斥去。各豪家巨賈。釀金錢巨萬。打點內外。及攢投長公大將軍門下。征倭謀復者大半。而後來院道。又各徇情受賄。遂將十年前已經查革各

衛。已出甘結者。盡數留之。蓋至此而欺君枉法。益重君侯之累。地方官不得辭其過矣。僕愚劣人也。不及侯胡兩公遠甚。殷鑒不遠。豈不亦有戒心焉。惟是一點血忱。爲朝廷。爲地方。實不忍此輩歲蠹太倉數萬金。世世無極。而亟欲革之。倘得邀主之靈。藉君侯之庇。於此民窮財盡之時。去冒濫。改風俗。留世官以官英雄。存帑餉以餉戰士。了我忠君愛國一念。而本懷畢矣。別無他腸。過爲按索。若以此軍之故。波及君家爵蔭與子姓。真正功陞者。以沒君侯喬梓之勞。而傷朝廷優待功臣之體。則僕之所必不肯爲者也。頗聞此輩揚言往者行查。賴寧遠公得免。今公又在京爲奧援。第釀金錢爲前番故事。復何憂。信斯言也。冒功諸人。有泰山之安矣。常常護留此輩。遺他人以安。而反爲後日門戶之累。當如君家何。且夫人生之受享有數。朝廷之威福甚洪。始雖爲其所竊。而終有必收之時。世人之伎倆固工。造物之算法更妙。陽若任其所取。而陰無不還之理。今以無功之人。坐冒延世之賞。迄乎今茲。亦造物打算而欲收還朝廷之時也。若復逆而留之。全衆人以爲自全之計。竊恐衆人之受享已盡。君侯之伎倆空勞。則何如以此輩聽之朝廷。付之造物。置若罔聞。而我反得安全無恙之爲得計哉。嗟乎。世界原來缺陷。

人事難得完全。任其缺陷而已。乃圓滿矣。若求完全而已。乃破綻矣。是役也。眼前若於聲實少貶。而以謝全遼之忿。以消陰陽之忌。以輕君家之累。以造子孫之福。圓滿完全。實在於此。爲朝廷計。實爲君家計也。忠告之言。願君侯詳計之。而無與俗同。幸甚幸甚。

答杜鶴林總戎

麾下杜門。浹旬矣。中丞公謁不出。僕書一至。而麾下即出。僕色華矣。心感矣。顧僕何德。以動麾下。麾下爲封疆念。頭自真切耳。嘗觀自古英雄豪傑忠義節俠之流。何者不從性氣中做出來。人無性氣。正如頑鐵。敗絮亦復何用。前以廉將軍事奉勸。今來書願以爲志。三復之喜而不寐。如秦廷奪璧時。藺豈不性氣。及道遇廉。則引車以避。見藺砍殺時。廉豈不性氣。及聞藺言。則肉袒以謝。蓋古人氣性。用之正事。不用之間事。當時則用。過去則已。僕亦嘗害性氣之病。往往發輒過當。及發後又輒悔不已。及一悔而千了萬了。故嘗以此自喜。麾下云斷不與該道較。是非此真能志廉者也。調遣兵馬。以防寧前一帶。是目前第一義。謀異心乖。豈惟尊慮。僕亦慮之。總之。我不爲異。而人自同。我不爲乖。而人自和。人即欲乖焉。異焉。而過有所歸。麾下亦先以同者和者。盡其在我者而已。

矣。旌旂西指邊關。偷過寧遠。効廉將軍與該道相會。一笑而釋之。豈不千過萬過。都卸已盡。而且以益見麾下之賢。幸麾下聽之。不一。

答陳心龍監院

頃者力疾陞見纔畢。而小腹下一毒橫發。大如覆碗。宛轉呻吟。日與匡牀旁午。欲俟稍痊。即出關完宣慰之局。乃疏請勅印。了無消息。一似度外置之。無所關緩急者。而始不得不悔出山之誤矣。更承台教。益覺駭然。遼中無兵無餉。既已至此。老道長既已深知。今日不發餉不添兵。遼事決不可爲矣。何不流涕痛切具疏。使廟堂知其危緊。急圖照應。以便後來措手。若不先時催請。而使不佞驟言於一旦。則朝廷之上。必且以爲故作張皇。不信而大事去矣。夫以一年所集數萬兵數百萬餉。而擲之一日。以致殘敗空虛之若此。當事者諱而不敢言。或初一言之而不敢再言。自是情所必至。而時時告急。惟老道長言之而無罪。而且以見急公憂國之誠。幸留神速圖之。

答汪靜峯制府

頃聞河東主客雖有五六萬人。皆傷殘老弱之餘。精銳已盡。將吏已盡。內所恃者獨川

兵萬人耳。然多遊楫充數。無衣甲器械馬匹。而又恃衆橫踞。託云劉綰主將已故。不聽調防。當事者曲徇其言。止分發遼陽城上戍守。成何事體。東山新募礦兵。及官戶民間兵更無賴。前日臨陣。望影先遁。其餘則殺傷未盡。與老營疲卒之先奔者也。鄰邊徵調。旣無一應。以遼守遼。又屬空談。然則今日之事。亦何恃而可。日者東不乘勝奪北關并開鐵與西人合。已爲失計。萬一有人挑弄。悔其前失。而窺我現在之軍匱。援集之不前。再逞於一旦。而以全力攻其一路。何以應之。此弼之所以晝夜星馳。而邊遑靡計者也。頃以積勞積熱。發其夙病。暫住涿州調治。稍愈即當馳赴。不敢遲緩。百番尙俟。而請指揮。不盡。

答楊滄嶼經略

自錦州一別九年。山中無便郵。起居徒切神往。昨年東事告急。朝廷特起明公經畧。聞報之日。爲東人手額。以爲必濟。不圖天發殺機。人值劫數。雖有善者亦未如之何也。然而一劍雪恥之盟。三年報賜之信。古英雄轉敗爲功者。往往而是。以明公扶危濟傾之才。東西除盪。老於行間。謂宜寬文墨以觀其後。而乃遽論成敗。解兵權以授於素不更

事之人。是尙爲度德量才。而知人善任者乎。今主憂臣辱。義雖切於救頸。而兵盡矢窮。勢更難於措手。况人情驚亂。議論紛淆。把舵無人。轉圜尙隔。難又有不獨於邊者。瞻言及此。則明公之弛肩。日見輕快。而弼之負擔。日重憂愁。眞莫卜其稅駕矣。相見有日。統容晤宣。不一。

答周毓陽中丞

經畧巡撫。一體衙門。河東河西。一鎮地方。而巡撫尤經畧之家當。收拾河西。尤進取河東之張本。豈諸君於此而猶貿貿耶。往家居見裁巡撫之報。不覺頓足歎以爲必敗。亡何而清河之報至矣。假令經畧不兼巡撫。必駐遼陽。當是時擁大帥重兵以自隨。距清河僅一百七十里。聲勢甚近。邊且不能來窺。卽來窺而我兵知救援不遠。必能爲我堅守一二日。以待大兵之至。乃西駐廣寧。相去五百里。清人絕望。而一日遂下。此裁巡撫之效也。嘗謬謂遼左如人身然。邊長二千里。爲三衛。與虎慙大衆所環據。此其周身風寒。已外感如此其深。內之農田戰守一切所謂元氣者。又內傷如此其重。而東兵則癰疽之潰爛者耳。須巡撫設法羈縻。有以外護其風寒。大修戰守。有以內固其元氣。使

其人已有生理之可望。而後經略得以肆力於潰爛之癰疽。或攻或託。方能措手。不然未有能治者也。是故固腠理而養榮衛者。巡撫之方也。而經略千金託囊之訣實不出此。乃分彼此東西。而各作一觀。則亦不察之甚矣。虎慙挾賞之局。仗老年丈夫苦心調停。此封疆之慶。社稷之福也。加賞銀兩回寺。公堅持不予。今多方設法。漸見次第。定有以仰副盛懷也。臨楮瞻切不宣。

寄里中士大夫親友

承江上餞別。徘徊中流。幾不忍分。別後天氣晴霽。二十一日過恨這關。閱昔年所修路。了一心願。是日宿信陽。又奉嚴旨催促。兵部差官及舊役持各衙門相知書至。折視之。忽見有九卿科道會議欲代經略之說。使人錯愕進退失據。夫宣慰之役。原爲遼人信我。不忘我。能安撫平定。而不肖亦自揣遼人能信我。不忘我也。故欣然就道。以趨其急。何圖忽有此議。假令遲行五日。在家得信。必審已度勢。而力爲之辭。乃竟爲癡心熱腸所悞。孟浪一出。懊悔何及。猶幸楊修老草疏未上。而兵垣已有遼撫改經略宣慰代遼撫之疏。視疏亦同兵垣意。夫邊事未有不聽兵垣主張者。或猶可亟止也。惟是遼東大

勢已去。有萬萬不及救不能救者。四路進師。僅存一路。而砲車器械復。皆丟去。赤身徒手。雖存弗存。若長驅取遼陽。遼陽必亡。不然而打通東西。北取開鐵。開鐵必亡。若待不肖。到日留得遼陽爲根柢。留得開鐵以固北關。隔西人爲障蔽。或可措手以圖其後。而第恐其不肯徐徐以待我至也。一盤棋子已盡。地方已殘。除是拭過再下。若仍用殘局。從何處覓子。何地下著。此國手之所掉臂不顧。而不肖之所拊臆自怨者也。一生嘔血做官。既被人逐回。又復拉出嘔血。命緣蹇阨。夫復何辭。門祚單薄。兒子幼穉。統祈照管。而危塞一身。皆有所不暇顧也。仰望仰望。

寄龍泉張五雲先生

遼已失其大半。空身赴之。外無應援。內無幫助。七尺之軀。已擬交付朝廷。置成敗死生於度外矣。家事一切不問。惟以小兒奉託。幸時時丁寧。勤讀慎交。讀書作文。如期循序。無有間斷。淫朋薄子。毋與往來。自然志有所專。念無所雜。何愁學業不進。品地不端。見於小兒爲父執。有惰慢非禮。何妨罵詈。何妨鞭朴。邇來人師樣子。專以寬順其意爲主。偷得成就一功名。固是好事。卽不然亦不失爲謹厚子。有光多矣。

答陳志寰

彌自甘廢棄。久矣。一從詬逐。無復世情。幾載耕農。苟活性命。不圖公朝悞獎。遂及虛庸。早夜思維。但深慙悚。况以一盤全負之局。而冀一撥即轉之功。則無子空枰。何憑下手。旁觀冷眼。誰與點籌。羣公苟且夕之以爲安。九重置緩急於不問。似此景象。安卜所終。此彌之所以日夜驚愁。而大海出山之悞者也。仰惟台臺以前輩之典型。作後生之師導。如彌者。貿貿以來。冥冥而往。欲拯溺而溺已濡體。欲救焚而焚已及身。先生亦何以爲孺子先策。而免於大聲疾呼之救乎。歸依自幼。瞻對末由。未申贊候之忱。先受膏沐之醜。再拜登嘉。感激而繼之以愧矣。敬緘勒謝。臨啓曷勝佩戢。

答周毓陽中丞

頃腹毒小平。復生臟毒。痛苦倍甚。方臥床褥間。忽接台諭。言馬帥密約宰煖。卜三處攻邊討賞事情。且謂中多未確。欲作紙上談兵之功。則老年丈已灼見無遺矣。正欲力疾回書。而後劄又抄馬帥屢稟見示。細閱一過。何馬帥信之輕而見之滯也。用人攻人之說。從來有之。如漢諉南北庭自相屠殺。而我得乘敵以臣之之謂。非餌之而委曲求助。

也。唐餌匈奴吐蕃。取天下。復天下。長安東都之掠。今古寒心。即我文皇帝用三衛靖難。而左臂之斷。至今爲患。古名臣善用邊者。惟汾陽一人。彼其忠義足以結之。恩信足以結之。威望足以懾之。悞聞其死則犯。一見其生則羅拜而泣。今有汾陽其人否。三處有感恩畏威如藥師羅其人否。慈人體面頗大。賦性頗直。要賞則挾賞。安能嫗嫗作効勞語以爲騙局。而宰煖狡桀憤作伎倆。彼見春秋賞有成例。不便開口。故借此以增賞。賞一得而遂以爲例。安問殺人。即質有親子頭目二三人。而彼亦索我一官爲質。即明明渝盟。我終未敢殺質以速釁。究亦被挾拱手而還之。攢刀犯誓。此濫套語。遼中何邊不攢刀。何日不犯誓。未足恃也。況就稟中情節。不止卜爲可疑。卽如所稱宰不欲煖卜等。知臨時自來先討些賞。如宰差使往約北關解仇同盟金白等。謂宰向無信實。且恐宰不忘前仇。誘兵於外。再有暗兵尅彼兩寨等情。是宰一人且瞞煖卜先騙賞也。是金白且信宰不過而恐其暗圖也。安望其爲我同盟。而馬帥遽謂左聯金白。右連三處。一鼓掃蕩。何言之易也。卽令各邊同心同盟爲我真確無疑。且問三地之師。進於何路。欲繞北關之後。從東北角入。則三處必以爲遠。欲從北關境過。則北關必不假道。欲從我內

地直入。而吾輩未敢保也。且問三處之師。進於何時。欲附大兵同進。而我兵將安在。甲馬安在。器械色色安在。約之此時。得無早計。欲如馬帥自言帶領家丁。另一作用。竊恐未能圖人。而反爲人圖。吾輩亦未敢保也。况用之而勝有勝之害。不勝有不勝之害。無窮醞釀。未可悉陳。總之中國之體。自尊中國之力。自全偶一。覬挫而遂。卑辭厚幣。餌狡桀。不可知之。國以求其助。無論中其誘與否。而其取笑四方。貽譏萬世。亦已多矣。視喪師辱國者。間能以寸乎哉。初入都門。一二相知。言及此事。弼頗以爲非。載承明問。不敢不以直對。但宰煖等原欲借此効小勤爲驅賞計。今旣勘破。勢必羞忿。即馬帥見其謀之不用。亦必謂吾輩不肯擔當。有推過於人之意。而不知此事不可從。弼非獨爲遼。爲國家。亦爲馬帥也。幸與馬帥善。作善收。切勿說明。用本意。第借北關不諧爲辭。而委曲謝之。或設他辭。以緩之。使其不疑。不然是一處未已。而又生一處也。關係甚大。惟老年丈密切善諭之。至禱至禱。

答韓鼎宇中丞

過恆山承款教甚渥。別後熱毒橫發。比至都門。殆不可支。榻臥竟踰月。未能出門。見一

客也。承以選將練兵見教。而申之以勤哨探。謹烽堠。嚴功罪。明賞罰數事。此皆一定之正法。而弼之所可勉而能焉者。至傳聞主調不主募之說。亦有之。初本兵及兵曹數客下問用兵幾何。弼應之曰。聞邊有死兵四五萬。法當三倍之。而問者遂謂開口甚大。又問招募便徵調便。弼應之曰。邊腹招募已見大意不如徵調。以見在之將領。見在之兵。可以應猝而問者。遂謂主意在調。此說之所從來也。夫使收合見在。足以充用。何故開此大口。苦人以所難。況以我喪怯之三。當敢死勝氣之一。此口猶覺窄也。播之役我以二十萬攻彼三萬。蓋六倍之矣。當是時以幅員全盛之屬。又百姓安堵。無風塵內顧之憂。而其徵發且遍天下。今以殘破僅存遼瀋開鐵四城之遼。又有西北之內憂。且逼近京師。存亡安危。關係宗社。反欲小小開口。苟且支吾。恐當事者亦未深想到此耳。至於遼中果能招募足用。何等近便。何等省易。且欣然樂而爲之。而何苦定要徵調。受仰面於人之氣。耽遠不及事之憂。弼實無意主於其間也。頃亦與樞部有明約矣。無兵無馬。部中之責也。有兵馬而不能訓練。不能調度。不能約束。經略之責也。若且夕命下。亦惟先儘遼中設法做去。不遺餘力。至於做之而萬不能前。有本兵在。而弼亦安能代任其

責耶。新贊畫處置李帥。用而不用。誠爲有識。然與其旣用而煩人處置。孰若當日不用之爲妙。則持議者過。而用人者亦過。今之主持遼事者。大都若此矣。可勝歎哉。

答周敬松南大司農

久廢田間。苟活性命。不圖公朝悞獎。屬以東方之役。循省虛薄。其何能堪。初謂趨赴宣慰。過往過歸。可遂竣事。及遂始聞代經略之說。意已不勝懼。比至國門。細探彼中之事勢。與裡邊之人情。而懼且滋甚。有不得不悔出山之悞者。今戰已不成。其爲戰矣。而守亦不成。其爲守。今之守。惟坐閉遼。潘開鐵四城。冀免失陷之罪已耳。自東南起。自西北一帶邊堡。大者如清河撫順之類。小者如東州柴河之類。皆已尅盡。而我不敢出城一步也。哨探不敢到邊一望也。城堡屯寨盡。而四城隨之。守且不能。尙言雪恥洩憤之事乎。假令東肯歇手。而聽我以守結局也。猶有息肩之期。而無奈不歇手何也。正恐加賦按括之事。乃方始耳。興言及此。可勝流涕。

與楊滄嶼經略

事有此愈急而彼愈緩者。當事諸公之待遼是也。旬日以來。爲此徵色發聲。不爲不甚。

而竟不能得諸公之心之一動。薊兵皆四千名。昨謹於中協挑一千五百名。東協五百名。併已遣過關五百名。共二千五百名。然皆不堪戰者。而在薊便以爲精銳。不意遼兵在在之弱有如此。聞真保欲以薊門修工者。撥二千名搪塞。是兵部僅以數。取各鎮僅以數應。徒費錢糧。而於遼竟不得一兵之用。所謂耽虛名而受實禍者。非耶。

與京師諸公報代

都門飭承教愛。銜德而往。感與途長。前月念四日。以兵馬八百護隨出關。關東諸地。或慚虛聲。或感舊惠。挾賞者頗就款誓。原款者頗送馬匹。皆厚撫而遣之。儘饒氣色。只苦後實不繼。終爲所窺耳。自鐵嶺方陷。復聞東西合營之報。星夜馳赴。兼八百兵馬亦不及隨。渡河而東。逃民亂兵。紛紛道路。遼陽富勢家眷皆搬出城。文職官亦各私買馬匹。待再報稍緊。爲逃計。乃彌至而人心始定。細訪東西合營的信。乃總兵李如柏虛報。其意不過欲張大聲勢。以蓋不救鐵嶺之罪。不知遼城士民。爲此一語。逃去無算。可恨也。奮經略出師失意。諸事廢弛。固無足怪。乃道將各官。終日昏昏忽忽。何曾見做一事。今即一一行之。一一語之。口乾舌敝。而猶作癡眼以相向。數日以來。爲此憂焦。至廢寢食。

惟有拊心嗟歎耳。鄉言邊聞彌至。將來難得志。欲於刻下乘其未備來攻。如不勝便齊死於遼陽城。即朝鮮亦有咨來報。其意甚惡。今遼城各兵。雖有二三萬。皆無甲馬器械。一旦守城。惟火器最要。今皆入於人手。城上城下。憑何擺列。萬一臨陣。赤身徒手。真有莫如之何者。百番軍中急需。萬望居中作主。謹因報代之便。肅函附候。苦情危狀。萬不及一。而今且未暇殫也。

與兩李賀三總兵

傳聞東兵從三岔口入懿路下營。賀將軍且哨探的實。看撫順清河邊外。果無大兵。然後可往北救。如撫清有兵屯聚。此誘我人馬於北。而欲乘虛南來也。將軍當相機進止。如果盡北。而將軍與之遇。亦須看其多寡。少則馳之。多則持之。如果欲南。便須兵徑趨遼城外。偃旗開壘。以頓其銳。然後擊惰尾歸。可以得志。切勿就在煙臺。與之探頭一戰。萬一抵當不住。兩下失顧。危道也。至於二李將軍。謹慎戰守。只以瀋陽爲重。守瀋之要。只以與之相持。勿開營輕戰爲主。試想懿路是箇空城。何故下營在彼。明明哄我人馬跑走累倒。而却從容來瀋來遼。此易見者。東李將軍自願出來總兵報効。須設方略應。

禦務保萬全。不得只悶悶兀坐。動稱拚死。拚死何益。徒灰軍士心耳。祝之祝之。

答張元中大同道

彌之冒然而東也。謂遼事尙可爲。不意纔出關而鐵嶺陷。纔抵遼而北關又陷。自總兵道將以下。無不相對而哭者。獨畏彌法嚴。願拚死去戰。不過信口一句話頭。而私蓄馬匹以待逃者。人人皆是也。何況軍士。今甲馬器械。一一俱盡。欲買而無處可買。欲造而無匠可造。請之庫局。市之關西。而又急不能到。本以絕地。偪在危城。搓手頓足。日有長嘆。若東不長驅。應援早至。身地兩全。幸也。不然命也。復何言哉。忙而鎮之。以靜。剛而練之。以潛。智欲深。而勇欲沈。人欲和。而守欲固。可當座右四箴。老公祖之教彌至矣。敢不書紳。

與內閣兵部兵科

併藩於遼。雖非初謀。而內察衆情。外審邊勢。自不得不出於此。合遼馬步近八萬。而挑選堪戰者。勉湊一萬五千。內八千屬賀世賢。手下者。仍令北駐虎皮煙臺一帶。當其來路。而柴國柱李光榮兩帥。止共得七千。於遼城周圍設伏。亦單弱之甚矣。萬一東率數

萬。全力攻遼。尙不知諸將何以抵當。而尙可分力於藩。兩守兩悞耶。頃周毓老惟恐讓東長驅。屢書商議。以并藩爲不可。而弼必行之。蓋旣以厚積自固。又以張揚疑邊。冀幸緩此一二月不來耳。缺將一疏。大可寒心。當事者見兵將俱亡。難成營伍。城池俱陷。不像地方。遂於員缺不復疏補。以致殘卒募兵。俱無統束。不得不於各鎮將領中。一一填補。聞長安中有謂前疏計將太多者。而不知將來尙不穀用也。恐各地方爭留。惟力爲主持。無罪無辜。罹此凶厄。朝夕莫保。想仁慈所憐亮也。

與王立字道長

薊門將帥。蒙老年丈大力主發遣。此非獨急國。實以急弟也。感何可言。遼危甚矣。使弼稍可支撐。必不呼籲至此。後調將領。仍乞主持慨發爲望。煖炒等力薄而心散。實不能制東。見宰賽被拿。雖各懷恨。然終爲所牽制。須得虎人作主。方能糾合。今河西河東。俱差通使各處挑激。然尙無一下落。俟得實以報。李永芳欲降之說詐也。弼亦用詐。付一諭帖以動其良心。緩其凶計。賈朝輔非常好細。圖作開國功臣。一見而疑之。好以相待。關在本衙門內。多方誘餌。更不一吐實話。及次日送到朝輔之子僅十歲。始盡說東與

李永芳等商議遣來之故。及出門差馬騎送。由老寨至新寨。一切情狀。明悉如畫。始一以其子言質朝輔。俛首無詞。然終竟不肯說真情一句。及審隨行六人。俱各吐實。而彌始殺之。臨刑嘆曰。使緩我半月行刑。大事辦矣。言東兵必來。而渠可活也。詳以附聞。不盡。

與柴李賀三總兵

將軍在外甚寒苦。不佞心念之。特送羊酒奉勞。別具不腆。代花紅豫賀。一切遠探密防。相機行事。將軍自有定算。不煩多祝也。古云。恩洽飲膠。暖生挾纊。今軍士用命之時。幸加意撫綏之。河水滿濠。遼陽已作金城湯池矣。并附聞。

與內閣兵部兵科

各鎮援兵甚孱弱。一人三餉。而無一實用。深爲嘆惜。又此處數百。彼處一千。雜亂不一。而膽氣又怯甚。赴遼陽如湯火。頃山東標兵竟挨住廣寧不敢往。恐其有他。亦不復強之。看來還是川兵心齊膽壯。若使當鑿一面。可以獨任。但再調四萬。恐難駕馭。只如小疏精兵二萬。亦自足用。然非該土官親領。該道親押。必又蹈永順三千之轍。而吃緊尤

在將官。如張神武總兵陳寅輩。至於火器斷非張名世不可。頃欲專設火器兩營。從千把總中拔出兩人。如張希清等者。假以守備。剗付分管南兵浙兵。上緊訓練。而將領中極無一可統此任者。懇乞立放數將。以應急用。至於郭有光劉孔印俱老成別歷。可與商量軍務。而麻承恩藉其馬力。以備馳驅。亦不爲無益也。

答周毓陽中丞

昨據清河報有三千從鴉鶻關出攻。已又報此三千係堵口者。其馬步精兵。俱調新寨。欲在二十三四日入。又據報將鴉鶻一帶守江之兵。俱調回寨。度東自剋北關無後患。而又當此月分可攻之時。其空營而來必矣。分防力單。其來決。重兵集遼。其來疑。昨已遣柴李兩帥各帥兵會同賀帥分防威寧奉集虎皮一帶。聯絡以截之。可截則截。未可截則歸城外營堅壁以老之。日來親率諸將築城開河。引水灌濠。或亦可恃也。顧又想其守清河調守江兵如前空營而來之說。固是一端。或因前并藩兵。椎牛大饗數日。示欲進兵之狀而恐我。大兵從撫順相持。別軍從清河來搗。故亦調兵守口。爲自防計。而未敢遽來。或來而止攻村屯。亦未可知。總之來不來皆設法以待之。只諸將蚩蚩木石。

難可仗耳。挑激炒巴等并結虎愁。深得牽制之策。誠今日第一救急奇著。然至今尙無著落。况尊諭炒花近又疑畏。若款事未完。賞數未定。則炒巴與虎愁等必不肯先自聲言用搗。必待往來講覆。皆已允許。而後聲言用搗。當費幾許時日。而九月十月。已早過矣。此時須是急急結局。方有救於遼陽日前之成敗。懸果允許。厚犒自不足惜。春間新受我惠。眼前又得二萬犒資。可無歹心。開心見誠。與炒兎等以釋其疑畏。或不肯允。巡道已到任。應以此專屬之。仍諭該道且勿東來。致有耽閣也。如何。

答李夢白督餉

頃於玉田道中得展台函。三復大旨。謂陸運未可行。則天津截糧。永平召買。難以達於關外。而不知陸路有關。海中固無關也。同一海汊。形如菱角。登萊天津蓋套。各居一角。而舟行其中間。各指其所至而至之。所謂北岸者。猶天津之往登萊稍傍南岸云爾。實由海中徑望東行。稍向北轉。而趨蓋套。甚明白易見也。昨會薊州餉司李君澹言海運之便。陸運之艱。及會薊州豐潤各州縣官。皆山東人。其說皆與李同。而豐潤李令。又云去年一小車運草五十束至山海關。給腳價銀二兩八錢。至典賣車驢不得歸。後增至

三兩。而車戶俱逃無應者。及問此車可載米幾何。答曰三石。是豐潤去關僅三百餘里。而運米三石。已費腳價三兩。若自關至遼陽千里。小啓前謂每車三石止費銀三兩者。猶屬窄算。而沿路邊兵攻奪之虞。軍民護送之苦。且勿論也。或曰今年召買原少。故漫言海運。而假途陸運。以見其難。子必沮之。卽異日乏餉。且有詞于子。而不知日今登萊不數旬已運至數十萬石。有成效。天津永平直向旅順以達蓋套。亦有舊道海運自可行也。每晤登萊士夫。言彼處米極賤。小錢四十文。僅值銀四分。而易米一斗。當北直三斗。今歲又大熟。順永保河一帶米俱賤。而歲俱熟。召買自可多也。誠使及令設法廣糴。多方募運。以至冬初。奚啻百萬。此區區之愚也。不過欲多運以活軍命。省費以節度支。而實未敢定阻陸運不行也。至前與官賜老偶定每年本色應運七十餘萬石。又一啓言料豆六十餘萬石。此猶開原未破時言也。今兵馬徵調。比前倍增。糧料亦應倍增。計非歲運二百萬石不可。須亟疏約定大數。責成山東北直撫按。轉行近海便水各州縣。限數分糴。運至水次。交兌海船。如吾鄉免糧之例。而督餉者第總其成。方克有濟。若只專靠登萊。專望截增。專發倉穀。專改京折爲本色。竊虞其數窄而易窮也。去年海運米

少。價湧貴十倍。客軍賣盡行囊。至典弓刀不能易一米。腹餒且怨。戰氣之衰。全由於此。今年開原斗藟三四錢。人馬餒死。城中者甚衆。運吏始請就近村屯設防圖其供給。爲就食計也。遂爲值者所窺。以至破陷。殷鑒不遠。念之寒心。彌與翁台休戚相關。與他人事外者不同。故慮深而心切。有不得不如此者。非好盡以賈增也。瑣瑣冒瀆。主臣主臣。

與黃黃山大司農

日以疏揭。冒有干觸。非敢以疆吏仰犯中樞也。時急勢迫。有不得不然者。目今援兵猝不能到。新兵又復全逃。而遼益急急矣。自不得不深望台下。早爲救援。而望之深。則責之備。以責備而開罪於台下者小。惜責備之故。轉以責備各衙門各鎮省。而因是以保全封疆者大。則不佞處其小。不失爲後生之薄劣。而台下居其大。且以全元老之壯猷。豈不休暢之甚耶。況台下之所難。在功名。去就之間。不佞之所難。在性命。生死之際。苦情急狀。更有可原者。諒古慈之所深鑒也。今第一應著。全在發薊鎮入衛各兵及新調之兵。在通州天津昌平者。勒限出關。仍一面馬上催調各省鎮兵馬。作速就道。庶於緩急有濟耳。萬萬留神速賜施行。幸甚。

與周敬松大司空

小疏前後討熟鐵二十萬斤。鋼四萬斤。鐵已如數發運。鋼止許發一萬斤。不足應用。再請給一萬斤。顧鐵爲三眼銃。鋼爲刀斧鎗箭鋒刃。而計未嘗計及於戰車也。今計每車鎖鑿鍵釧釘鑲之屬。約成器五六十斤。非毛鐵一百五十斤不可。約車三千輛。用鐵四十五萬斤。恐一時不湊。應先發三十萬斤。應急。費腳價約五千金。以數千金之費。而能救一鎮之亡。以鞏固神京。此必台翁所首肯者。非獨救遼。亦以救賤性命也。老先生當事。忍使鄉里後生。有不保性命之憂乎。與言及此。涕泗交頤矣。

答周毓陽中丞

初守道用川兵守城。又分遼陽城人爲兩項。一舊編壯士守城。一新編官生富室人爲城操兵。守各巷口。後撤川兵下城。該道力爭之不得。且一城而分兩項名色。以開趨避之路。誰肯認壯守城。遂用一條鞭派之。而該道又力爭之不得。遂忿然置之不管。除夕各道向關科言守城非川兵必不可。元日各道復以爲言。彌謂邊前聞川兵下城拒戰有憚意。今若知下而復上之故。爲遼人不肯守城也。將益速其來。且遼人何嘗

不肯守城。每逢五逢十日聽點候一兩日。而官竟無一至者。上自以法戲耳。於遼人何尤。守道曰。本道用川兵及壯士城操兵守得極好。只因老先生變動前法。且委洪鄉官經理本道將奪而管之乎。抑分而管之乎。所以不好攙著管得。弼笑曰。委用洪鄉官。不過借遼紳諭遼人耳。而豈予之以印耶。明日閱科以川兵爲言。又明日仍以爲言。及初四日監院亦云。

與姚益城閱科

同心之言。其臭如蘭。大易有焉。臺下此行。不獨有造於遼。卽謂爲不佞立命可也。書中數語。亦賸之公牘。令海內知吾苦。尤非想望所及。且小疏借餉以急兵。而大疏言兵兼催餉。并東西而全及之。尤屬合論。關門不欲煩總督者。恐其作好好先生也。如昨山西募兵。楊帥明疏其不堪。而當關者亦不見一點驗。令人火不療身。但知做情。誰肯顧人家。死。活。所以借重掌科。以示重示專。如臺見以總管更便。卽及此一段。而重加責成。亦正見其同也。逃兵駐南衛運糧。且未可遽開此口。恐招者聞之。益以殘弱搪塞。惟當嚴檄催令強壯補伍。爲設防戰陣之用。俟其齊而再議。如台議未遲也。

與監軍道邢參議

四十

西人入開鐵。取所棄遺。諸將雖不宜裝聾作啞。而事有輕重。勢有緩急。今兩帥回城。而賀帥獨疲人馬於蒲河以北。暴露冰雪之中。糧草皆盡。不知此行。爲得策否。萬一東窺我兵在北。突來遼陽。而以一枝人馬綴賀帥不得南。將如之何。卽無此事。而以征東人馬空爲西人所敝。亦非計矣。愚意欲撤回。恐該帥藉爲口實。日後更不照管。藩蒲以北。西人之事。欲聽其自爲進止。又恐人馬凍餒疲憊。無以供二三月東方之戰。惟門下以己意與之商量。諭令且回虎皮驛防守。以息軍力。切勿說出自不佞意。若門下見謂無妨。亦聽之。原稟附覽。

與各道總兵

數月以來。而各營兵丁之逃極矣。初逃之時。各將官中千把總不知也。直至逃後月餘。領銀散封。方纔知覺。使其肯於平日逐名點操。又能不時設法抽查。何以至此。今各軍漫漫散散。如無拘管收攝之物。無論將官中千把總不識其面貌姓名。卽同夥軍士。從未聚在一處操演。亦彼此不相識認。縱有逃者覩面不知。如何拿補。今與諸將約。除新。

行。分。窩。列。隊。逐。日。影。操。外。仍。立。抽。查。之。法。各。將。官。不。時。抽。哨。一。查。各。千。總。不。時。抽。司。一。查。各。把。總。不。時。抽。隊。一。查。各。百。總。隊。長。則。日。日。一。查。不。惟。面。貌。姓。名。日。日。加。熟。識。亦。且。彼。此。朝。夕。勢。難。私。逃。即。有。逃。者。旋。逃。旋。覺。旋。捕。於。束。伍。之。中。寓。禁。逃。之。法。似。無。善。於。此。者。又。接。軍。法。五。人。爲。伍。同。鍋。飯。食。同。窩。歇。宿。逃。陣。逃。伍。罪。皆。同。坐。此。尤。禁。逃。根。本。所。在。各。鎮。將。平。日。就。該。如。此。舉。行。他。日。行。軍。臨。陣。方。可。望。其。不。亂。惟。各。道。鎮。向。各。營。將。官。詳。訓。而。力。行。之。但。有。逃。者。即。將。同。伍。連。坐。重。處。此。又。不。但。爲。禁。逃。而。已。

與各道鎮

去。秋。之。并。藩。也。固。緣。民。散。城。空。亦。料。冬。寒。東。兵。或。不。至。今。春。氣。漸。深。逃。民。漸。復。東。兵。必。來。攻。陷。以。圖。一。逞。往。者。撥。派。三。鎮。防。守。虎。皮。一。帶。適。中。要。路。原。爲。南。顧。遼。陽。北。顧。瀋。陽。俟。今。春。發。兵。守。瀋。便。於。策。應。今。兵。部。既。不。速。催。兵。來。聽。我。防。調。而。地。方。中。又。遲。悞。糧。草。并。三。鎮。防。守。要。路。者。亦。因。缺。食。站。立。不。住。曲。從。衆。議。抽。回。遼。陽。而。策。瀋。之。兵。益。加。單。寡。萬。一。來。攻。何。以。禦。之。今。爲。保。遼。陽。計。則。瀋。陽。不。可。不。守。爲。守。瀋。陽。計。則。兵。馬。不。可。不。多。糧。草。不。可。不。預。此。必。然。之。勢。也。敢。煩。高。明。從。長。酌。議。守。瀋。人。馬。應。用。若。干。應。於。何。項。撥。

發。何將爲正兵守城。城守作何修備。何將爲奇兵迎戰。兵來作何堵禦。何將爲援兵策應。策應在何屯劄。首尾作何照顧。兵馬不足者作何那移調。撥糧餉不足者作何設法。遣運。此舉內蔽遼陽。外規開鐵。中以圖搗。用以牽制。關係重大。而兵寡糧缺。非不佞一人所能擔承。幸速議妥通詳。以憑會題。庶免異同。去年一并藩議我退縮何所。前日一說守藩。而又有議我不宜爲邊添一中火鋪者。此不敢不凜凜也。

答周毓陽中丞

自去歲十月半後。三鎮屢以糧草無處尋覓。兵餓馬損。皆要領大眾回城就食。第客留兵一千五百名駐防舊處策應。曾於十一月三帥兵馬無食。疏中明言之。而斷斷乎不從其請矣。及奉有據奏各帥以軍馬無食。欲撤回遼城。倘遇告警。何能禦之。明旨後三帥仍申前請。各部道仍力以爲言。弭爭之不能得。遂嚴批其詳聽兩監軍會同餉司分守開原兩道酌議。以便奏請定奪。去後批中詞旨嚴急。皆發性語也。慮前顧後。與台見甚合。乃無何而姚益老至矣。時部道已有於三鎮中抽回兩鎮。近城操練。更番設防之說。屢向弭言。皆不聽。而姚益老力主之。每晤必以爲言。蓋其意以一塊荒地。駐兵三萬。

馬二萬者半年。土皮俱盡。安所得糧豆。大將軍皆棲止一破茅屋。軍馬皆散處三四十里村外就食。徒餓損人馬。而又防操練邊。若以精騎萬餘。綴其三帥。而徑領數萬直趨遼陽。遼陽見兵。實殘弱不能抵陣。不如抽回兩鎮人馬。散駐近城村屯。既尋覓糧草便易。而又得日日操練。即東兵至城下無所慮。仍更番往防虎皮驛。以均勞逸。如此則三鎮兵馬皆得就食。皆得操練。何如飢困一處。無益於藩。而徒爲遼陽根本憂。此其說固長而可憂也。時尙在猶豫間。會兩監軍以詳請。而尺履躊躇。始不能不堅持夫初議矣。假令海陸輻運。實有糧草撥至三鎮地方者。足充兵馬之用。何肯輕令抽回。無奈各倉見貯。尙不穀補支十二月之數。正二二月糧尙在。山海關三壩牛等處。不得車牛裝運。此兵馬吃用何物。萬一有一奸弁者。乘科部道鎮皆欲撤回之時。煽惑各軍。不由經略之命。一呼而歸。可以處之。來教以此舉皆爲守道所悞。弼不聽守道言久。實由各部道及姚益老屢言始決。或者守道不自言。而陰嗾部道及姚益老言。以必伸其說。而欲遂其懦怯退縮之計。亦未可知。但三人占則從二人。今人人皆欲如此。而必欲以一人掬執於其間。誰爲我用。則前經略剛愎自用之評。必有綴而加於於弼者。此弼之極苦極

沒奈何處也。若使兵部實實調得多兵。應手分撥。俾得以三萬人戍瀋陽。成得一堅。而毋示以瑕。即束綴虎皮。徑攻遼陽。而瀋陽戍兵。且得直搗邊地。以議其後。何至退慮根本。收我之虛聲。示我之實怯。如來教所慮者。此近日疏揭於本兵。不無責備者。誠被時勢。追到性命地位。不得不然。此正責成本兵幹事。不令卸肩之意。非如言者以必去爲快。而有別腸也。統惟裁鑒。幸甚幸甚。

與陸霽澤文選

時凶地危。即上。下同。彼此併力。猶懼不能濟。今遼陽道不任事。聽其以病去矣。而贊畫亦慢無所事事。蓋鄉里之間。固有所難行。而軍旅之事。亦非其所任。當時起用之者。原不從封疆著念。不過借封疆爲名。作一起廢人情耳。募兵一萬八千餘人。皆簽派銀差屯民充數。旣臨白刃。皆思逃去。贊畫畏其逃也。將官有稍裁以軍法者。輒庇之。兵恃其庇。乃益逃。即未逃者。亦俱屬無用。而臨陣必逃。但一言其無用。輒變色相爭。即令逃近萬人。猶硬言他日能戰者。必此兵也。不佞以其爲同年同部同臺。又鄉先生也。但屬意下之。未見贊一畫而徒撓人畫。奈何。夫原設各道。當此軍興時。卽本等職業。尙拮据

不前。與經略共軍事者。獨贊畫監軍道三人。今竟虛其一而無用。仗誰幹辦。且監軍道與諸將爲僚儕。情理浹洽。好得商量。而贊畫動執部體臨諸將。自副總兵以下。皆欲行屬禮。而諸將又不肯爲之下。往往彼此不欲見。即見而無一交驩語。文武不協。又軍中大忌也。爲今之計。只有急陞贊畫。改贊畫缺爲監軍道爲安便。然贊畫在臺時。有扶世道功。以忤時被斥。今募軍雖逃。而當三路開鐵接連覆陷時。猶得藉起義聲勢。以保遼陽。實出其力。今同斥者喬朱錢劉六七公。皆起京卿。贊畫應與之同例。若第以尋常方面陞去。則贊畫必怨不佞無休時。孟子曰。爲政者不得罪於巨室。爲其議論氣勢。能爲衆倡也。況軍中猶藉鄉紳鼓動人心。而一有沮惑。爲患且深。望門下亟以京堂處之。改其缺爲監軍道。以求早得一人之用。若遲陞一日。則悞疆事一日。此今日第一急著也。惟立賜裁斷。幸甚。

與姚益城掌科

頃接撫臺書。言抽回兩鎮事。算前慮後。極有見識。當日鄙見原是如此。及承臺下屢教。及部道輿議。又當從長斟酌。而中所甚恐不敢對人言者。尤在乏食激變。譁而徑歸之。

虞。假使地方中糴運糧草。足供三鎮人馬食用。即使遼陽空虛。亦不肯遽聽其歸。是其使三鎮不得不更番抽回者。一坐糧草。一坐兵部不催援兵出關。應手調撥。雖欲不示人以瑕。不可得也。遼陽虛實緩急情狀。望一一向撫臺盡言之。以見事勢有不得不然者。恐長安中又如并藩之說。紛紜一番也。批語詳稿及往復書稿。并錄呈覽。不一。

答董翼明中丞

去冬報簡中奉到台札。欲留川三四員。如大疏所稱其人者。敢不仰體台意。但前小疏雖討將材九十二員。半多中千把總。如尤岱杜勇之類。非皆將官也。即係將官。亦但憑各官明報據以入疏。而賢否相半。已無多可用者。乃賢而可用者。各鎮俱留用。而第以否者來應。甚失初調之望。李秀袁大有侯體乾及尤岱。乞臺下速遣之來。以慰倒懸。如無人用。望留其餘以補秀等之缺。不然。是又以否者來也。因有兵役來催。故不及還答前諭。再因便役一申之。惟台慈鑒諒。

與京師諸公

今二月初旬矣。本月分折色無一文。本色無一粒。連人帶馬十數萬之飢軍。誰肯甘心

受死遼陽鄉城十數萬之怨民，誰肯甘心受奪，不有兵變，必有民變，而邊又其緩耳。今金錢尙在，太倉一千六百里之外，而大司農不見慨予，米豆尙在山海關三壩牛八九百里之外，而地方官未能猝運，眼見兵逃馬死，民受強奪，而官求自盡，此是何等光景，即欲不愁死，恐死亦不可得，顧猶不爲中外諸公所憐，但一催之急，輒起許多嫌，怨，空集而卒，無濟於緩急，何能復向大司農求速發多發，向地方官問早運遲運，惟以生死求救於主上一策耳。生平善飯，即去秋帶病出關，猶日食數盃，今食少事繁，刻刻愁恐，眼花心跳，鬚眉盡白，有死徵矣。誠願溘先朝露，一了百了，而不忍坐見軍民之禍，繼邊事之禍而起也。痛念及此，淚如湧泉矣，惟乞台慈憐鑒。

與內閣台省督撫各衙門

時勢至此，不得不急，不得不嚴，即急矣而仍以緩應，嚴矣而仍以玩應，更有懶且傲者，具全副精神，不爲地方作一事，而徒勞之於稟揭書札之間，逢人哭訴，著處傳流，甚而造捏鼓煽，如枉斬逃兵，塗死川兵之類，豈真以爲不能容不善用，而欲陰怒兵將，以自快耶。部道鎮將亦各有一段因緣，即或躁急自能，以時地見諒，而心直無藏，口快無巧。

性發無留事公無私尤諸君所共信也收拾聯屬所謂我自用法耳而本兵遂舉此以弄機械過矣夫下任怨而歸德於上同事分怨而歸德於主者然後主者可鼓舞兵將於其上而使之用命今也反是不離而強間使離無怨而硬坐爲怨即諸君不肯生心而不佞亦可以自裁矣此地非由我壞此官非由我願向投此禦魑魅者四年纔逃一性命往南又爲羣魔所弄放逐江畔何曾作一日太平官享一日自在福今又重來揀性命與魑魅作對而人情又如此韓退之云得一事爲名便可自罷去收拾云云八字此不佞罷去好題目也小揭請教不一

答姚益城掌科

屯田之議洵戰守良策即弼按遼時曾及之但彼時額軍月食四錢或二錢五分除屯種自給外可餘其半入官今軍皆月食一兩五錢歲計一人力作所入且不能自給十八兩之餉况又無軍可撥無牛種可辦開鐵棄地去秋遣菑田禾尙不敢往遂瀋熟田百姓尙不敢種若有兵防護百姓自能種何煩軍種南衛地墾人多無田可屯惟自三岔河以西至寧前一帶多曠地而又無軍可屯議者有欲用贊畫兵屯者今尙不知招

回何狀。卽能招回。而海蓋道立等請作趕車之用。此亦難可指望。承教欲如前議撥兵護藩。挑南浙兵不堪戰者。一邊防守。一邊屯種。竊謂護藩必須守藩城。縱有兵不堪戰者。且先作城守之用。況今正苦無兵可撥。卽遼城前承台教。以遼人難恃。政用兵守。至今裏北城一面。尙缺撥派。而何況於藩。卽今雖未護藩。而百姓依然持命往種也。安所得間田而屯之。極欲設法作此。而躊躇無計。惟臺下與周毓老再一商求見教如何。邊臺銀兩。該道已收訖矣。此役大都用前守城壯士。而貼以見在守城之兵。或不致一概勞苦。而妨其訓練。且事有必不可已者。奈何。將領不肖者。自彌受事數月。更換淨盡。不敢留一人一時以自悞。近多援將新來者。一一無逃於台鑑。蓋此時將領多平平。未必能辦邊。而至於乘機隱冒尅虐不悛者。或有所未敢也。俟與各道再商之。先此奉復。不盡。

與周敬松大司空

以今日所請乞於京師者。不但人厭。亦行自厭也。貧兒沿門持鉢一二過。猶有哀其餓而予之者。若數過其門而號呼不已。主者怒而撻之矣。不肖今日實類於是。然不如是。

除是將此半塊疆土舍而置之不顧。然後可。苟事勢不敢不顧。則物料不得不需。每作咨請求。躊躇萬端。而後下筆。若稍可已。則亦已之。而如其竟不可已何也。又別無可買之處。雖欲不屢瀆台端。亦何可得。所需弓面筋。鱧皮張等項。皆眼前急缺。各匠停手以待者。惟速賜給發。以解倒懸。聞人謂遼東後來未可知。而徒搬空京師。將無爲籌邊者。或臣子所不忍逆料。至責不肖體恤。裡面財費艱難。誠無所逃罪。然此等說話。最悞事。更乞台臺有以破之。不備。

答陳心龍監院

蓋套米豆運至鞍山者。承台檄海道徑運入遼。以供急用。且省守候。此濟急無量功德也。復蓋逃軍幸拘集有緒。非藉威靈。何以得此。然亦須行贊畫。海道揀選壯強。解來收伍。或撥防他處。庶有一人得一人之用。今錢糧如此空匱。海陸如此艱難。車牛人夫如此煩費。而徒養此一種無用之人。以爲召募結逃局。不但不佞不忍。卽該司該道。亦必有所不忍者。至於耽兵馬之虛名。使部中作爲實數。以坐經略他日不效之罪。不佞所甘受不辭也。頃聞長安紛紜。以此兵之逃。爲過嚴所致。嗟嗟不佞何曾向此兵呵一語。

策一箠。此台下所知者。而橫被惡聲。今即以老弱解此充數。亦不欲問。但於此心過去。不得耳。敬復不一。

答山東按院陳中素年丈

遼不可爲狀。諸疏揭。知俱入邸報矣。邊情已萬分難支。而人情更萬分難處。總爲催促兵餉兩事。致叢怨訴。今兵之難不必言矣。而餉更難。蓋難在車牛。有車牛又難在趕車夫役也。遼人幾何。既募爲軍矣。又安得此爲夫數萬者而役之。爲其夫之難處也。即應減車牛。而車牛又必不可減矣。且必不可緩。每月計軍計馬費米豆十四萬石。草一百五十萬束。或運在八九百里。二三百里及百里之外。非數萬車如何能穀。恐餉部所取數尚不足用也。今困中原以事邊塞。彌日夜體念。倘非朝廷建都在此。此塊土可徑棄之不用。而無奈大勢有必不可已者。無論建都。卽如山東僅隔一帆水。無遼東而山東亦禍且剝膚也。百凡事望老丈與王帖雲公祖千萬委曲設法相應。此與各省鎮所處地勢。更相關切也。附使申懇。不任惓惓。

與寧前道王化貞參議

頃接撫台書。謂朱推官怕來遼東。而借口不佞之法。是又爲收拾聯屬者作一旁証矣。頃相知屢有爲本官先容者。皆謂以迎接之遲。獲罪於僕。以廣寧署道而接過杏山。非遲也。特因其居道官。坐道堂。通判走角門。儼然道也。而又謁見立通判上。以禮教之。原出好意。火器之差。不候僕批。僕不得不一問者體也。相知皆謂僕有物色之意。不誣甚乎。惟門下速催之來。毋爲僕裝點一嚴字公案。若必稱病不來。萬一如守道之覆例。而悔無及矣。

答袁位守永道

天下不患有難事。患人。不肯拿出真心做事。我心度人。只圖籠得過一日快活。推得出自己擔子。而竟置人家死活於不問。卽以關內一二道論之。或借防守留將。或西來援兵不與應付之類。假使其人與台下易地而處。豈惟經略難。而督院餉院且先難之。其起台下於永道又暫屈之。而不卽開薊府者。是天尙有意於遼。而僕與督餉兩公之大幸也。以此感激之極。至不啻其口出。匪私匪諛。畿內及各省募兵無用。正欲出疏商之。而重違願往者意。然勢自不可已。承教非真視國如家。視僕如親身痛切相關之甚不

及此。牛皮已買者。望速先運應急。大砲鐵鋼等項。驟車順帶甚便。凡差官視上人之意。爲緩急。買毒藥者。諒能體台臺意。不敢遲時日也。附謝不盡。

與蘇水石太僕

都門極承教愛。自入遼。遂缺聞問。敢有遐心。時凶地危。情急勢迫。誠不暇於濡削耳。遼事不獨邊情難也。上下中外。不同心。不應手。尤其所難。東兵推不來。來則遼陽或無恙。而瀋陽寬鎮。但攻其一。必無幸者。蓋兵少無可撥防。道遠不及救援。而所望各鎮。及近調入衛薊兵本兵。又只口角。不即調發。更苦者無芻糗。無車牛轉輸。即欲撥防。而供饋不繼。懼有他變。雖欲不坐以待斃。不可得也。制邊定須火器。近得文受寰書。謂黃鍾梅欲效呂宋鑄大鋼炮。一發可斃萬人。而台下書亦及之。弼思此物重大。雖於行營難動。而置之城門及扼要地極便。不知已造成否。倘與二部商議買銅造得十數位。車運來遼。誠無敵之神器也。臨穎懸切。不盡。

答王浮東道長

曩公車之牘。自用人攻人。後復爲同舍鬪不休。未有痛言及遼事者。惟台下需兵甚急。

一疏。懇切周到。責備當事者甚至。而至勉專閫請將。期成經略。身任國家之任。苦心捍衛社稷之功。尤非不佞所敢望。所敢當。即欲削牘陳謝。會親往撫順勘地勢。查邊形。俾示進取。俾自隄防。不敢出圖。我往返數日。然後歸修城濠營盤。爲遼城戰守計。以此自不暇給。遂爾缺然。而台下且先惠書教。至謂讀小疏而酸痛至極。淚數行下也。不佞自惟何修而得。感動台慈一至此。而又安禁其淚之涔涔交頤耶。夫中外上下同事者。反不同心。而台下獨心照之於事。外人之忠誠相越。豈不遠哉。敬謝不宣。

答劉贊畫國籍

兵之逃也。御兵者之罪也。非年丈之過。亦非兩弁之過也。寧營之三易將也。佟鎮國之易。乃年丈以爲應碑識。單盡忠之易。乃本弁以足病屢告。年丈豈其忘之耶。而謂弼以爲仁慈多恐不勝任。復改委熊錦也。是彌憎得士率心者不用。而專用不仁不慈者。以致兵逃也。熊弁管兵僅二十日耳。而賊酷遽若此。所不敢知。獨易佟易軍一節。心中記得極明。亦同事諸君所共明者也。回部之說。非彌主意。彌之意閱科知之。餘部知之。而未便向年丈自言也。敬謝揭教不一。

與周毓陽中丞

守藩之說。誠人人能言之。而不敢任也。各鎮將固慮兵馬寡怯。尤苦糧草缺乏。卽餉司兩監軍及各道。皆不敢擔承。何也。慮寡怯不敢守。猶得以軍令督之。苦糧草缺乏。而飢不能守。雖有人敢往。而軍令固無如此。餓軍餒馬何也。以此躊躇未敢輕易斷送。再喪軍實。寒遼膽。非專慮兵少也。非甘令柴李與劉楊各帥兵團聚一城也。非推其責於遼鎮總兵。而以西東重煩老年丈之分明也。且兵少挑釁。非謬慮也。設卽遣賀帥及開鐵主將新舊主客兵馬與往守藩。總計不過萬五六千。喪敗之餘。以守坍塌極壞之城。而當數萬聚攻之兵。恐雖有柴李應援。而守者不能待也。何也。中固丁字泊之役。固足監也。況卽此賀帥一枝人馬。已缺糧草。屢攢眉向監軍道言兵飢馬損。不能任戰。恐柴李亦不能以石填腹爲賀帥援也。關內騾車牛隻。誠相逼而來矣。而各道廳之身任轉輸者。牛隻出關餓損。及到遼陽。僅存皮骨。而死且相屬也。纔到遼陽數百隻。而韓署道卽請撥發各道也。纔備車一千二十二輛。供丁一千二十一名。纔請用銀差夫役也。逐節分任。第如斯而已耳。何時得車完夫完。何時得辦萬餘輛接南饋北。而搬秋青草於其

中間。又况本地召買。及蓋套糧已撤盡。而今春海運且無期也。賀帥一營馬匹或存八百。而死四百。或存八百而死七百。或存九百而死九百。猶曰將官不惜馬也。開道於自募兵馬。亦既惜甚矣。原額一千九百七匹。而死除五百七十七匹。此糧草之缺乏明效。大驗也。非各將借此以爲解也。去年并藩於遼。而藩固在也。非棄也。揆之當日邊勢人情。不得不然。今年藩則確確當守矣。原疏十八萬。陽清河撫順柴河各三萬。鎮江二萬。金復海蓋各一萬。而遼陽僅議二萬。且作外援者。謂各路已進兵據要害。相持境上。不致來攻遼陽。遼陽緩故止需兵二萬。非謂各路無兵牽制。致得悉衆來攻。而我可以二萬守二十里之南北兩城子也。撫順一路。雖議用三萬。而疏中自有或三路牽制。而陰并一路之說。非一路定止用三萬也。即一路原議三萬。亦謂三路俱集。能彼此聲援。非聲援無一。而一路可僅二三萬自完也。今見在兵馬除舊畫新兵未敢算數外。其餘則劉帥領萬餘。分堞而守矣。川兵一萬一千餘。扎營城外矣。楊帥領山西募兵及新配義武九千餘。皆烏合未練。不能出防矣。新到田萬年土兵未便遽外撥矣。此外則賀之一萬一千有奇。柴李之各九千有奇而止耳。守藩須將前兵撥一萬登陣。二萬拒戰。於

城外三萬分居奉集虎皮驛策應。而遼城僅存二萬。即虛遼實瀋且不論。而糧草缺乏。實是無法區處。此則惓惓仰望於老年丈之所贊之者也。前有牌行監軍兩道。會各道鎮議守瀋之策。欲要會題向兵部催兵。戶部催餉。督餉催轉運地方官催車牛夫役。承教以微密之議。不宜抄傳。輒復逡巡未敢會稿。昨晤高監軍道。口述台札語意未詳。而彌直索觀之。讀至去年棄瀋之議。爭之而不能奪。今年守瀋之議。贊之而未敢強。而惶懼汗下矣。當本兵角口之時。中外莫肯同心應手之日。地方真情實狀。獨恃一老年丈知而助之。乃相距四百里。而亦有所不盡知者。不得不一言。再爲商略。惟老年丈有以教之。不一。

與職方解郎中

昨接撫院揭帖。言將贊畫發兵盡發南衛寧家當差。此極有理。又言將募兵盡戍南衛。減去月餉一節。不佞思之。若將此兵盡撤回衛。則清驍寬鎮一帶。正爲其南衛之入路。憑誰戍守。今撥此兵守清驍寬鎮者。正所以守南衛也。南衛其庭堂。而寬驍一帶。其門垣也。此兵應盡聽經略過驗調撥。切勿如疏覆之。近來覆疏多露機鋒。而復討入衛甘

固各兵應急。疏徑分廣寧。不知貴衙門是何意見。自分愚拙。實不能奉黃老先生奔走。作口角中經略。只負主恩不忍去。又時不得去耳。惟門下善調處之。若作一口出氣。而不佞惟有白劾而去一策耳。真切真切。

答劉勿所年文

初議屬國之役。宣慰爲名。監護爲實。駐扎義州。爲彼聲援。爲我犄角。而兵部乃徑以寬奠覆也。寬民已散。僅遺一空城。將兵皆遠伏村屯。不敢住。此其難駐也。不獨在事體也。若分駐義州之說。在今日亦有可商量者。凡軍中事體。要兵部主張。今願推之於彌。彌即駁之以強其從。而不能強他日之一一應我也。兵須三萬。方能惟我所欲爲。如兄與職方所往。復兵從何辦。今日且善推。何況他日。彌兵且不處。何況兄兵。萬一失悞。進退兩難。此其難一。駐兵彼國。須彼國情願。今陪臣旣作如此呈辭。而國王聞信。亦先咨彌。以爲厄行之計。若監護到而不相照管。旣失吾體。強令照管。又離彼心。此其難二。原議駐義州。兼團彼兵。因彼糧。今不用彼糧一粒。則本地萬山中。何從尋覓。必須海運。泛大洋入鴨綠江。而登來旅順一望之程。天津山海順岸之道。尙費兩年議處始定。又從難

運處新議一番。恐司農督餉及淮漕諸公。亦不應手。此其難三。成大事者必謀於衆。今部道鎮一見部覆。皆懷疑畏。公同稟沮。切勿上疏。不但弼不便違衆。即他日兄亦不能專倚所領將官行事也。此其難四。夫監之以察其情。護之以援其急。彼有急而不欲人護圖。已至於邊地情形。竟有不可知者。屢獲奸細。供稱有謂外邊無鹽食。高麗送鹽醬草料者。有謂聽得高麗人說。若天朝借我兵馬來征。我們在旁下營決不動手者。有謂高麗常送鹽百十馱牛馬百十頭者。想該國爲其所迫脅。見我兵難援。面與和好。以緩目前。自其本意。而真心固未嘗不向我也。我只得包而護之。以安其心。而且免於目前之援。若兄到彼監護。察知其情。問乎不問乎。報乎不報乎。其難處更有倍於前者。此弼之所以躊躇反覆。而不敢上疏者也。以中外不同心之時。得同心如兄者。恨不旦晚立至共事。而人情事勢。其難如此。弼之不能爲兄計。正其不能自爲計處也。至於發銀二萬兩。付陪臣順賚而去。甚失天朝頒恤之體。即不專使宣慰。亦當以銀付經略。差官賞之。既免煩費該國之慮。而經畧亦得藉此市德於彼。以伸吾聯屬之權。蓋兵部之處分。大都如此。更難與之講話矣。敬以情覆。不盡縷縷之私。

又一熊子廟堂幹旋。方纔如意。不然徒自苦無爲者。三復思尋。加以慨歎。不覺心灰意冷。因此近日以來。天氣漸涼。惟以飲酒射箭爲事。後院隙地僅二十丈許。置一鼓如雞子大。引弓射之。中與不中。自賞自罰。自喜自惱。聊以送日私爲得計。不謂生來命苦。夙欠樂緣。脾爲酒傷。手爲弓傷。頃漸泄瀉。而兩腕更酸痛欲斷。翻爲所困苦。若此本欲以作事之念。消思家之念。而既已如彼其難。本欲以飲射之念。消作事之念。而又復如此其苦。則奚所排遣而可。今作事念頭尙蠢蠢欲動。以爲達衆不祥。力抑之。獨發一願心。欲將常平穀積滿三十萬石。長爲遼中人命。而經年不准一狀。數月不批一詳。前院未完紙贖。又盡數豁免。杜門半載。正如面壁達摩。顧安得金錢。了此一段功德。乃者銖搜鏹括。亦漸覺有次第。直二萬石無着落耳。日來情況益無賴。惟只盤算僞功與此兩事完。仍卽前飲酒射箭。爲送日之計。眼前人惟有年丈別久念深。何時過我痛飲。一消磊塊。憑楮依依不一。

與監軍道高參政

近見各邊報。凡審回鄉奸細口詞。俱稱三月內邊怕我進兵。俱各山頭設兵伏探。以防

我入。如我不入。便於此月內進兵。凡河東河西流懿蒲撫清髮所報。如出一口。視此前情近真矣。今我既不敢入其境。若其出來。我又不能拒。便當作一虛聲。若實爲進兵之狀。人備乾糧。馬備香料。窩篷行鍋。一行令軍中備辦。使將官皆實實做之。切勿令將官知我爲虛聲。惟柴李賀楊四鎮守知之。而誠勿令洩。於初十日前後先發將官二員。好兵各二三千人。於奉集占城小尖山松樹各一帶屯劄。使其知我必進兵。必隄防。自家不出來。此亦先聲奪人之意。今賀鎮孤兵在外。柴李各鎮。似無出意。第將城壕作一正經大事。全不想個算計人家法子。設疑使之不來。若東兵來。無論遼陽卽攻。瀋陽陷。村屯有何好處。且行營一切事體。全不提。如行軍五人共一油布窩篷拴馬釘。檣造飯鍋口。以及軍中必用之物。不但行軍與否。俱當早備。年兄與邢監軍道可請凹大將軍在本衙門靜處密密商量。屏去左右。勿令一人聽見。其辦備乾糧香料行營之事體。只是暗暗傳令各將官與各兵密密備辦。便信以爲實。若行牌與官兵。官兵不信。人亦不信。且亦不必與將官及各兵說往那裡去。此民之可使由之不可使知之之意也。如會得有些意思。同來見弟面商如何。

答文受寰制府

前日寧固三營入衛兵馬。皆彌所討應急者。不意部覆竟將甘肅一營分與廣寧綏地。寧固兵馬如堪。望從實沙汰。毋取充數。爲兵部口實。今科臣選發出關之說。成畫餅矣。向不敢煩瑣翁台。今不得不爲政矣。前發援兵出關者多不堪。欲要揀選發回換補。但此時兵少不得不姑留之。俟兵再集。勢必回換。若以後兵馬仍前。但到即發。終費往返。不如任些嫌怨。從關上發回之爲便也。且使兵部不得以過關虛數陷彌於罪。尤感激。匠役安家銀兩已回咨如命截留矣。

與監軍道邢參議

以標兵易甘肅兵。再承催詳。正作咨間。復思甘肅兵更替不常。前入衛薊鎮。雖修工苦。而兵猶肯來。來亦間有好者。而官亦肯打發來。若知入遼換班。則兵必設法求脫不來。官亦斷不以好者來。如連接彼處。疏忽自見。似覺遼兵猶得常便。近來西將視遼兵如秦越。皆置之度外。遼兵亦度外其將。彼此無一親熟念頭。所以致兵日日逃走也。亦將兵者之過也。門下再與高監軍一商之。若換得直過。猶當相安於無事。若換一更代不

常無心戀我之兵。又不如本地雖逃不能別往之兵也。至於斷逃之法。先在西將加一分親熱的意思。使兵不忍逃。然後責備河西嚴拿。使兵不得逃。若只專靠河西拿捕。而自家無一親熱情意。是教之逃也。且換兵之說。是我輩私地商量。如何就令兵士聞知。致逃者日衆。則西將之不欲管此兵。而故縱其逃之意。亦居可知矣。惟確商見教。

與監軍道高參政

地頭撥軍既弱。撥馬更瘦。前往撫順。眼見所騎馬匹不成模樣。而總兵親養丁夷却留以自衛。不肯哨探。只會抄人稟帖。似此總兵如何靠得。幸即移書各帥。速遣驍壯丁夷騎雙馬。直到邊外哨探。或酌遣埋伏。以丁夷誘之。殺他幾個撥軍。使不遠入深探。此大有關係事也。各總兵如何。今尙瞌睡不醒。可嘆可嘆。

與柴國柱李懷信賀世賢三總兵

數日前報何其緊。而今又何緩也。以僕算之。聚衆於關上者。致我而因以疲我也。我兵出而反退舍者。懈我而思以乘我也。此際隄防更當比常加謹。切勿少懈。使得以出其不意。今當遣兵以探之。設疑以悞之。日則曳柴揚塵。遍豎旗幟。夜則連營結壘。多張

火炬以懼之。或豫伏強弩火炮。用遊騎誘入以擊之。若貪小利。輕逐以入。其伏此我所最忌者。其埋伏引我之法。用得最熟。我官兵皆知之。而皆爲其所中。貪小利之故也。第一要心。心心念念。時時刻刻。如東兵在面前一樣。孔子云。臨事而懼。好謀而成。此兵家之祖也。懼非畏縮。乃是敬謹之意。三軍生命。萬民生命。在大將軍一身。可不敬謹而圖成謀乎。惟大將軍留意。

答張文達同知

凡做事者。須要任得怨。方能成得功。昔按遼時。築遼包城。做墩建倉。一時興舉。不勝其勞者。怨詛盈耳。匿帖遍城。不佞一切不顧。曰。一年怨。兩年忘。三年感。四年思。已而果然。今纔見一匿帖。而足下遂爲所動。不爲此輩所窺耶。幸以老僧不覩。不聞。法待之。

勸王肖乾中丞

古之人有傾蓋如故。白首如新者。此其人必非功名之士。而後有此投合也。一入仕宦。之途。樹名節。則交相爭明。功罪則交相忌。因而獻媚。工譏之輩。乘間抵隙於其間。於是乎交相疑矣。憶往歲于役河東。同舟年餘。推懷處誠。無纖介之嫌。日者甫推經略。貴同

鄉同年同門諸君。紛紛參論。遂開形迹。致凡事皆避諱。而不敢直言。卽婉言而未蒙採納。亦不便再言而遂止。蓋三月於此矣。今事已至此。猶避諱而不言。誤疆事而負主恩。罪莫有大於此。夫固知軍興之不可已矣。而車牛不早備。以致軍餓馬死之誤。月餉之不可無矣。而官咨不早催。以致二月停支之誤。軍馬之多不堪矣。而選練不早行。以致混雜難用之誤。河兵之不可駐矣。而要險不早設。以致冰結鑿凍之誤。邊謀之不肯歇矣。而環城犄角。連路扼截。不早圖。以致臨渴掘井。忙忙手亂之誤。非有意於誤也。台下以急欲成功之心。而乘堅於偏信之見。又迫欲慰河東之望。而動於邊勢。分忙且急。各悠悠之言。以爲一絕好機會也。但西人一到。可以不戰。安用齷齪修守爲。以此夢寐間。亦想東兵來渡河。而置前項一切於不問。豈圖事機乖左。一至於此。今旣一一俯就。修守之事。便應細細想守。真正圖守。實實做守。確確持守。以爲必能完。中心歡然。踴躍而爲之。而大疏乃曰。守非臣心也。守而能完。非臣敢任也。一似恥於修守。爲萬萬勉強不得已而爲之之意。而仍想東兵來渡河不已者。以此修守而守能完否。果有不敢任之日矣。願台下信此守爲必能完。以固三軍之心。壯諸將之氣。而雖有二十萬不能善其

守之書不宜常見之。疏擢間也。況兵法吝倍而主人半豈有六萬能進而二十萬反不能守之理。且二十萬不能守。必幾十萬然後可。關西援兵。關外潰卒。皆云不可用。必討何兵然後可。易言進而實不敢進。難言守而實不修守。不過爲日後留一張本曰。此七八月間不進兵馬不到之故也。不知五六月間科道纔出門調募。七八月間兵馬能到不能到。即到而能戰不能戰。台下所自知也。縱有機會。能乘不能乘。或誰禁而不能乘。亦台下所知也。何必口口主矢。使不知者皆以爲僕咎。鎮江之事。如同謀毆人。誰當先誰救應。前後著數。俱須安排預定。然後動手。今但謀發而不謀救。即捷到而亦不謀所以救。亦台下所自知也。是否復名城。得兵三萬人。保全三百里無恙。亦台下所自知也。而不知者又以爲僕咎。河西塘報多觀望。有合於言進者則報。不合則不報。僕已據他報屢責該鎮矣。即西人情形。日日通使往來。謬託心腹。且無一驗。何況河東。如東兵救鎮江失利。攻鐵山失利。勢分與忙且急。誰曾見來。即果分果忙果急。而我能過河不能過河。亦台下所自知也。僕七月二十七到任。八月初四得報捷大疏。初六即出關。至廣寧。議欲萬人襲海昌。別遣五千奪蓋州。斷其歸路。而台下不敢任。亦其所自知也。而本

兵且不進廣寧一步爲僕咎。夫咎僕者咎其不能佐台下以成此進也。而止圖暗進，不敢明進。止圖小進，不敢大進。三議進，三中止。反覆躊躇，併其暗且小者，亦付之且罷且罷而不敢爲。則自不得不出於守矣。自不得不以完守自任矣。而乃曰守非臣心也。則誰之心也哉。前鎮江捷至時，聖諭謂台下指授有方，將士用命，遼事漸有次第。調度廣寧兵馬，相機而動。僕但嚴飭兵將，控扼山海而已。昨部議僕出關，聖旨但謂節制地方，有急督兵策應而已。凡一應調度防禦事宜，自是主守地方者之責之事。其所倚畀於台下者，何其專且重。況當軍民畏逃之秋，尤非心意慵懶之會。打起精神，感發軍氣，竊不無惓惓望焉。非不知此際文武大小諸人之情。去者要去，逃者要逃，病者要病，推者要推。光景極無聊賴。而台下第振挈於其上，示之以無恐，安之以無事。而人心自有所恃而不慌。何遽鯁鯁然以守不能完自却，而示人人以不必然之慮。前三路債師，開鐵北關連陷時，遼陽殘卒，及續到援兵，不過四五萬耳。去邊僅百八十里，猶能保過冬春無事。豈見兵十餘萬，又加將到近鎮及楚蜀毛浙各兵數萬，猶憂其不可守者，亦在台下之調度耳。每見河西要兵，兵至而不加養練，要馬，馬至而聽其餓死，要糧，糧至而

其汨爛。要器。器至而置之高閣。若由此道而不變。恐雖再加二十萬。而亦不能善其守也。高胡那韓。皆極一時邊才之選。台下誠委心任之。言言聽從。事事依行。而第責其効。必能幹辦以完此事。諸鎮道皆言台下外虛而內距。面雖悅從。畢竟自是其見。自行其意。而不人之是用。雖用人事有誤。亦必護而守其前說不肯易。不意謙和宏博之度。亦有此病。輒爲台下一誦之。行軍以嚴整爲第一。義諸將見台下太寬。皆有玩易不備之心。非行間所宜有。而過信細人之言。忽於大吏之議。則亦人之所欲言而不敢者也。僕本不便言不欲言。而功罪生死關係。又不得不言。知台下初見之必怒且恨。而徐徐思繹。亦將諒僕不得已而言之意。而於已亦微有消埃之助。且謂非僕而吾終不得聞此言也。

與王帖雲左司馬

治兵治餉。各有專職。軍餓馬死不能進守。以爲治兵者罪。則於餉亦不敢不問也。日者催處車牛之疏。第述道詳若干而言之。未嘗期必以如數。而責成關外意居多。亦未嘗獨倚辦於計部也。聞老公祖每語人云。熊經略在遼陽。討牛車若干萬。今皆何在。却又

要若干萬。且寄語外撫。極論東事費用太多。兵馬錢糧。實不能應。切勿效熊經略所爲。而直似以爲戒。始痛恨越職多言之取憎。而河西之所以每見稱於廟堂者。妙在餓我軍。死我馬。渴爛我米豆。而不題車牛二字也。大疏言撥軍雇夫。通限一月。將海濱米豆各處秋清草盡搬入城。以絕他人垂涎。是矣。但海糧百餘萬。草一千五六百萬。一月能搬否。卽能搬而城內能盡貯否。何談之易也。惟其談之易。所以視車牛爲可省。而多討者爲可憎。又言令登津旅順之兵。直攻金州。高麗義州之師。襲取寬鎮。鐵山長行島避難之民。助我先聲。隔江彌串堡渡海之衆。爲我後勁。邊東西分應。左右支吾。而不能得志於我。又是矣。而水兵冬月回船。能再往否。麗兵肯替我襲邊否。鐵山彌串等衆。遙隔河方。能與廣寧呼吸通聯先後聲助否。又何談之易也。惟其談之易。所以視趨運爲不必。而多討爲可憎。而今而後不敢復取憎矣。不但任地方餓我軍。死我馬。渴爛我米豆。而且任邊燒我糧。就我食。以困我。不復言車牛趨運事矣。前次經略一年四個月。止用過軍餉折色二百三十萬。本色百萬。疏揭具在也。而其後科道且謂僕空竭閭閻。流毒海內。而以天下僥倖爲僕罪。今關上未留一兵。未留一械。未領一餉。費用多否。何與人

事何用以勿效僕爲榜樣而啓他日言者之口實惟老公祖察之老公祖望重言重啓口皆有關係。如去春遼陽收拾正好。而大書一入長安。通國傾聽。非同小可。今月餉比遼陽時皆增加。有月十三兩者。而器械一一取辦於內。不似遼陽時自造自用。其費用委屬太多。委屬難應。然而多費不在僕。僕不敢承此榜樣也。又惟老公祖諒之。悚仄悚仄。

與長安公書

每河西舉動。不論可做不可做。能做不能做。而第設一做之之法以告於人曰。我已如此做。如此做。而又預留一做不成之張本。以待於後曰。我已嘗明告君父。私告朋友矣。固已慮及此矣。而無奈人不湊手何耳。此屢見之疏擢。可歷舉以相質者。長安中皆喜其爲真做。及其不效。又代爲之歸咎於人。人受其咎。而河西只消已慮及此四字。便足完其前件。此甚非明旨實在任事不得推諉意也。事至今日。不得不以疏責成。以書規曉。而付之知我罪我矣。八月間。廣寧滿城皆兵。而無一將統。滿城皆將。而無一兵管。不得已責之提督。一分屬之。若嗔人奪分兵之權。以予提督者。而不肯部署。簡汰援兵。參

處撫鎮。至破鄉情而不顧。無非欲兵精而餉省也。高道汰其所募廣寧新兵頗多。遂大怒而有婦人乘城束藁疑邊不肯汰退之疏。今已到未到兵皆不敢復選驗。他日兵冗而無用。食冗而不繼。自有任其咎者。惟是此等事體。不依行。何況其他。若河上委難駐兵一疏。不惟不依行。而且屢屢疏揭見駁矣。此後何可張口再論地方事。而至於己本不進。而遍傳經略不進。關上本無一兵。而遍傳好兵。好馬盡留在關上。不肯發種種陰著且不必論也。試看此等光景。是調和得否。此等經略。是做得一事留得一兵。好得一人否。況二方沮壞。而所用五人。議者議。處者處。復得盡前謀而收後勁否。徒留此一身爲廟堂調停體面。爲河西代認罪過。而竟弗爲經撫一段。必不能和之情形。設誠思想。設法區處。以圖疆事於萬全。他日與敗同盡。獨弼一人而已耶。與撫按書稿二道抄呈上。惟詳賜覽閱。而勿厭其瑣。悚仄悚仄。

與方孩未監院

昨那道稟當下兵馬。將官信地尙未分定。其兵馬之歸某將某將者。亦未撥定。卽戰守之局。似定而實未定。又似不專主廣寧鎮武者。夫此何時也。而信地兵將。尙未撥定。將

定於何日前疏定信守以重責成而今又云不專主廣寧鎮武楚又欲謀渡河耳竊聞此謀三月議而三月止矣。今番定有成謀。有遂事決無再止之理。然須慎重周全。而無一遺慮。或謂此行主意。原在暗去偷襲。出其不意。如前日鎮江事自可無妨。然邊情甚緊。亦有不可知者。趙充國曰。小利不足貪。此千古名言。最可味。況東兵是何對頭。與西人不同。亦非暗偷法所可對也。僕不便言。知門下有斟酌。幸秘似以詳何如。疏書微傷渾厚。然事到今日。禍已推在身上。不得不直直責成黜化之耳。抄稿附覽。

回王肖乾中丞

來教謂連日人心大奮。西兵亦然。若乘其銳過河取海州。一戰而勝。遼陽可復。卽不然亦可保廣寧無事。誠不勝大願大幸。頃聞前寧兵將俱東。則進機決矣。空身一經略。愛莫能助。惟洗耳於關頭。以聽捷音耳。顧又思之。我輩用兵。似當堂堂正正。以張軍威。得一城便當守一城。以爲進取之地。今一鼓而復遼陽。未可知。而直奪海州。自是容易事。但我入而所以守之之法。人救而我所以禦之之法。不可不先爲講求也。若第掩取而歸。爲其所追襲。此後一段光景。知台下已深想及此。而無庸杞慮爲矣。諸將有戰不力

而先走者。總帥有互應不如約者。僕即申檄督之。諸不一。

與方孩未監院

日者固守廣寧之議。誠愧失言。既已定議。置守於鎮城杜家屯兩路。已復改議迎戰於柳河三岔黃泥窪三路。而今又以河西人心大奮。將士亦然。議欲乘銳直取海州。以復遼陽。朝處夕易。迄無成畫。僕方欲待汝議論定時。我已過河之懼。及得來教。謂撫院欲渡河。以踐前言。則可謂先人一著矣。願又深揣於彼我進退之間。如明明建大將旗鼓而東。以揚我武。此時必不能。而欲仍掩取不備。如鎮江故事。無論爲所追。及有猝退不得之虞。即追不及。而民有再毒不堪之虞。以王師堂堂舉動。暗襲一城不能守。而跟踉遽歸。使人愈有以輕量我。民愈有以識破我。此必不可之道也。今欲爲渡河計也。當得尺守尺。以爲恢復之地。便當計算城得而吾何以守。邊救而吾何以禦。禦之勝。而何以徑復遼陽。禦之不勝。而何以殿之得過。三岔脫有不虞。何以使退軍收箭得住。何以使廣寧鎮定不搖。此斷未可以草草舉事第求踐言而已者。密聞經略衙門舍人鄭名卿新從遼陽來。謂邊以鎮江事恨遼人。曰無多兵來。便順從他縛我守將。我肯留與遼

人。再等大兵來順從害我盡數趕出牆外。不從者洗之。今海州遼陽俱無多兵防守可取也。以此撫台聞其言而進志蓋決。果爾固是一機。但予爲細算。豈其奄有河東。而遽欲輕棄。不置重兵防守也者。竊料海州遼陽。其必爭之地。而前言未可盡信也。進守機宜。僕已不得預一籌。惟門下商酌而行之。宋用郭京施六甲法禦金人。而劉孝竭等或稱六丁甲土或稱北斗神兵以附之。點嘗曰。非至危急。吾師不出。及金兵圍城。點曰。須自下作法。遂引兵遁去。而金兵遂入汴城。今令國威者豈其裔耶。總兵楊宗業自稱。日與某神相會。而竟不能出遼陽之圍。又眼前事也。書此一笑。

與內閣兵部

日來撫院以前言不效。近旨責成。遂急欲進兵。且擬有一疏。言臣自過河。不累經略。不累諸道。而監道與邢道苦之。弼知其意已決。以前日回書第勸其進。當得尺守尺。勿掩取遽歸。如鎮江事。當計得城何以守。邊救何以禦。禦勝何以進圖。不勝何以退守。而至於以我敗氣。當其勝勢。以我鈍敵。當其堅利。以我凍餒。當其飽騰。以我散亂。當其整一。以我暴露。當其休閒。而且無輪無礮。無以站立。無車無牛。無以轉輸。種種情形。猶未

敢深言。以冒慎重全勝不肯進之疑也。頃得爲危疆固守實難一揭。而前疏果舉矣。雖刪去不累經略數語。而力闢以守待戰之非。彌誠無以佐下風。預未議矣。顧又思之。自邊變以來。前後三經略。擁如林如雨之衆。拱手縮頸。如雀避鷗。兔遇犬。不敢以一矢加遺。誠有如撫疏所忿者。今幸以一矢加遺。便當報捷凱旋。而第云保過冬月無事而已。則安用決此奮志爲。憶弼前秋到遼時。殘兵四五萬。距邊百八十里。猶能保冬月無事。豈今兵馬十餘萬。去邊三百餘里。而以守待戰。顧不能保其無事耶。夫戰具即守具也。練兵飼馬。治械儲糗。設險扼固。守具即戰具也。聞有能守而不能戰者矣。未有能戰而不能守者也。誠如鄙見。收拾前項一切。而遊徼於沿河。分截於中路。宿重兵於鎮城。犄角割營。以團厚其勢。訓習其技。休養其力。安安靜靜。隱然示以不可攻。何遽不能保無事。而欲僥倖於一擲。豈守無堅城可憑。強援可恃。而戰遂可得遼海之堅以爲憑。西人之援以爲恃耶。且凡言戰者。必須甲馬器械及各兵皆到。然後具疏拜表輒行。前曾疏要八月進兵。已而三臨河三自止。曰。臣之畫以協應不速而無成也。今部署出師。旣已軍民大悅。人人憤激。西兵西弁。投牒願往諸道。將亦任戰而不任守也。趁此銳氣。便可

過河。一舉掃蕩。而猶需宣大之馬。近鎮之甲仗火器。及川土兵之出關者。等得到來。而冬月已過。軍民將道之銳氣已銷矣。不又爲協應不速所誤也。此等作法。皆弼所未喻。而又不敢復進一言。撫院不敢任堅壁之守。弼亦不敢任過河之戰。况樞部一口出氣。皆主決戰。今日之事。決當以撫議爲主。而經略又未嘗留一兵以掣其肘。又未嘗明目張膽。言一守字以撓其議。此亦撫院唯所欲爲。而無不如意時也。伏望閣下調旨。專責撫院。函甲渡河。明張撻伐。而毋以掩取速釁。完成戰局。而毋以協應推人。至於以守待戰之經略。與不受節制之巡撫。已絕不相干。不必泛泛如前兼責。經撫同心調度。使人兩無著落。而從牽制以誤事也。若乃弼之所憂。不在今冬之不能以戰而守。而在明年之不能以戰而成戰何也。以枵腹露體之衆。當裂肢斷指之時。四分五散於河冰海雪。朔風熒火茫茫斷魂之處。以疲敝其氣力。酷烈其體膚。怨傷其心意。而竟不得一棲宿遮蔽地。以蓄養而訓練之。雖人人賁獲。亦將銷磨到骨。而何以得其力於日後。究且終日言戰而終至於不能戰。若如鄙見所前議。則藏其威而今冬之守也可。養其銳而明年之戰也可。此不識時不乘機者之言。似亦可思。而非廟堂主戰者所樂聞也。統惟鑒

裁不宣。

七十八

與王肖乾中丞

頃高平道中得貴座師葉老先生書。謂人情亦知戰未易言。徒以僕不能守之說。遂欲庶幾僥倖於一擲。若使僕謂廣寧必可守。戰可徐圖。則又若舍萬全之安。以蹈嘗試之危。信斯言也。是今日迫台下過河者。由僕不能守之說也。而不知自出河上委難駐兵之疏以來。凡私書公牘。皆言能守者也。皆言守定而戰可徐圖者也。其言不戰決不可守。不戰而決不敢任守者。台下也。其言將兵六萬可以過河。若俟冰結。雖有二十萬不能善其守者。台下也。此非今日之言也。自七八月間主戰以來。屢屢告朋友告君父者之言。而僕猶恐二十萬不能善守之言。驚我軍民。勸台下不宜常見諸章疏也。猶自引前守遼陽事。謂殘兵四五萬。距邊一百八十里。尙能保冬春無事。而勉台下以十萬之衆。何遽憂其不能守也。今已十餘萬而憂其不能守者。亦台下也。貴座師謂僕迫台下於一擲。以致舍萬全之安。而蹈嘗試之危。則疏在書在。人在鬼神在天日在。僕有死不能服也。總之戰出自台下本心。而且至於癡與不能守之言何相干。况僕從來未曾言

不能守一字。卽廣寧人心已去一疏。正言戰不成其爲戰。而以想戰之故。致守亦不成其爲守。意在挽驚戰之虛念。作圖守之實事。而台下猶連疏決戰。必不能任守事。使終將至於不能守者。亦台下也。今以加之於僕。僕何敢受。夫僕自推經略受不明不白之冤。如撓權分事。扼回舟。與不進兵不救鎮江坐失機會之類亦多矣。豈可以此加之於僕。僕卽剖心肝爲貴座師言。恐終不見信。請以戰守本末。與台下親折證。惟台下平本心爲貴座師一白之。屈鬱之極。語言無擇。統祈臺下心諒。原書抄呈覽。

答王齊字制府

承大疏言。近日經臣選帶。營路幾空。不佞未嘗一選帶。空營路也。吳自勉旣被參。非營路官。其家丁五百。非營路兵也。不佞恐其零散。故調之。不過取其所棄耳。孫總兵五百人。施參將一百五十人。不過暫借以護此封疆之身耳。而此外無人矣。何至空營路而遽留題。允六百之標兵以相償乎。如謂關上空虛。則台臺所練三大營兵馬。聞已踰萬數之外。則調其半於關以資防禦。亦無不可。前小疏求近兵一萬八千。部覆五千。後復以爲言。部又增三千五百。及見台臺會疏。選調一萬。內分三班。是應調者實止三千。二

百人此徂公朝四暮三之術也。不佞但笑而不復言。何意三千二百人中。又留六百人而算抵。亦太分曉矣。廣寧兵馬。不得干預一人。僅此二三千人獨駐破城。爲廣寧策應。且當窺關護餉之衝。而台臺又欲留之。欲不佞孤身陷亡耶。必欲留請將三千二百人一起具疏奉還。決不敢占恠。若吳自勉未肯放進關也。右屯城上城下無寸鐵。故借關營各礮應急。而請那密雲緩地火器以示通融。承命遽於山永局造者照取抵償。則車上將何安設。而於進取又誤矣。今不得已檄總兵督催該局造完一位卽送來。以換原礮一位而歸。亦不得擅留關上物也。台臺雖以元老行邊。而薊遼總督其實也。遼西台臺。地方也。不佞薊東塘牌也。分別若此。而不佞無望。尙復何言。敬復不宣。

與葉相公

昨往河上。從邸報中接賜札一道。踴捧反覆。以感以懼。弼自來主守以爲戰者。未嘗言廣寧不可守也。其謂廣寧人心已去。正指平日以想戰之故。全不修守。人無所恃。而一聞過河。遂懼其不可知而先逃耳。此以戰誤守。而非以不可守迫戰也。如謂以弼不可守之說。使人欲僥倖一擲。則自七八月以來。講戰久矣。又誰之說使之耶。弼有屢疏在

撫院亦有屢疏在不必辨。昨佯移一書與撫院。剝抄謄之。謂別道中而杜公不久自明。亦毋庸於辯也。今戰事一聽撫院自言自止。條止條言而已矣。弼不爲後援。則出關何爲。自不爲先鋒耳。若度其不可戰而講求所以守之道。則弼有書。而撫院駁之。不徒駁之而已。且以人心之不固而逃也。惟守之故。且以憤欲戰者之懷怨對也。惟守之故。是尙可責成者乎。自會議置三方設經略時。而其同鄉同年同門。已有撓權分事。掣肘扼同舟之疏也。是尙可自任者乎。至其不能含忍而優容之者。此苦處自難言。夫自不進兵也。而推人不進。自不救鎮江也。而推人不救。自失其機會也。而推人坐失。種種伎倆。本兵主之。科道從而和之。此皆輕則戍重則辟事也。誰則暗受其弄假使推之人。而人無後災也。則何不可含忍優容之有。弼嘗移書相知。謂今日經撫之際。皆成於裡邊。愛有所扶。而憎有所抑。抑者不甘無故之加。則必辯。辯則所扶者之破綻亦出。而終至於兩敗。昨面語撫院。亦曰公非有意推弼也。特疏書中。率立一四方八面之話頭。使人猜而歸之弼。如機會坐失四字。謂自失也可。謂因兵馬器仗不至而失也。亦可。而求多者必曰此經畧也。况公雖不言。有本兵科道代爲發揮。而孤獨如弼。自不得不一

求明耳。近傳相公言於衆曰。撫院固吾門人。經畧亦吾舊知。重在封疆。不肯一毫偏向。仰惟至公厚之盛意。聞之感泣。以此輒將瑣屑仰瀆崇聽。知不以爲罪也。外出關見聞。述一冊書稿數道附呈覽。總祈相公深知地方真情。以便裁決耳。臨啓曷勝仰悚之至。

與王肖乾中丞

前議駐兵右屯。與鎮武對峙。如鼎雙足而站立自穩。如人兩守而捍衛自便。其兵則仍散處閭賜十三山。及附近各屯。非駐右屯也。護衛兩字。於身爲自衛。於邊爲示弱。故弗受。明知出自椽史。忽略。已與巡道韓道轉達此意矣。而台下乃以爲意。更自惶悚。今看來閭陽去廣寧杜家屯鎮武堡更近。故屬韓道來商。定此即駐右屯之意。而更爲切近者。鎮武閭陽須各一鎮一道。劉徵未敢專任也。其杜家屯至柳河一帶。悉屬鎮武照管。蓋東何畏於西寧西平。而必達百里從柳河口來。此可不足慮。而河東堡海糧及西鏡關路。則閭陽鎮道兼責焉。鎮城則兩鎮一道。而台下調度於其中。何憂邊哉。敢因是而併及之。不盡。

與各部队道

自出關以來。晤鎮道將。無不人人言不能戰也。平日摩拳擦掌。歃血共盟者。亦無不人人言不能戰也。卽撫台亦自言不能戰也。其平日言戰。皆空言。想戰皆空想也。不惟空言空想而已。而且以想之迷誤戰而併誤守也。且以言之。洩露已短。嚴內備而外速。邊驅民也。到今日仍不出此堅壁清野四字。以附會老成持重之說。而入於不佞。恆怯退縮之圈套。是中樞主戰者亦言今日不能戰也。夫戰與守非有二義也。不佞未嘗不想戰。而未嘗言戰也。雖未嘗言戰。而所做皆戰事也。訓兵。飼馬。治械。厚儲。修城。扼固。以備今日境內之守。卽以備他日過河之戰也。若一切未備。徒想過河之戰。而竟憂境內之不能戰。雖不謂之戰可也。況不佞又未嘗不言戰也。初議三方控制時。曾有疏言。廣寧用騎步對壘於河上。以形勢格之。而綴其全力。海上督舟師乘虛入南衛。以風聲下之。而動其人心。則必反顧遼陽。恐其內潰。而遼陽庶可復也。此不佞之所言戰也。今之言戰也。則偷而已矣。每語撫台以小利不足貪。須俟三方齊備。堂堂正正。爲一舉掃蕩之計。而撫台必遜謝。以公之所爲大作用。生之所圖小意思也。雖不謂之戰亦可也。每欲

將此慟說一番。而廟堂之上。意見已橫。前者屢疏甚明。一味不省。如搦管者。不惟喜隻眼之爲妍。而且覺雙眼之可憎。未可以口舌爭也。況三方之事業已寇仇。登萊路。人天津。二方被其破壞。而所用各道。參者疑。疑者疑。又諸事沮格。不肯經略之一聽。此裴度所謂事事抑沮。但欲使臣失所。不顧朝廷大事者也。旣已亂其本謀所爲戰。而孤身孤堡。爲一方代守禦。卽伸己之戰說。而亦無益也。出關見問。本欲入告。而恐重廟堂主戰者之恨。故不以疏而以述也。非獲罪也。惟詳賜省覽。幸甚。

興葉相公

頃承還示。深以遼東用兵。騷動海內爲憂。欲要如黔國例。捐遼之利。俾人世守其地。專力禦邊。毋累內地。此寧邦之至懷。而固圉之長計也。反復籌之。將俟復全遼。俾世守以捍外乎。抑就今日而言。捐河西之利。專河西之力。以與之母累內地乎。國初遼東官兵自食其地。後人民掠盡。屯摧荒廢。雖有租賦。搭放軍餉。僅存原額十三。雖有雜稅。僅供官役廩料公費與撫賞之用。而每歲仰給度支。猶額餉七八十萬。馬價八九萬。撫賞十餘萬。未有餘利可捐予也。元昊雖強。而宋家所據守涇原秦鳳環慶諸州郡。皆生齒財

物殷勝之地。其人皆中華固結而無二志。以此自足抵當。而天下晏如。無征調轉輸之擾。遼東三絕地也。自秦漢以來。止設督護羈縻。未著版圖。千餘年未有歸我一統如此其久者。而氣數循環。亦是有盡。是謂天絕。四面周遭三千餘里。皆邊皆海。僅關外橫亘十里。與內壤相接。如一筋繫贅瘡於身外。而極難救援。是謂地絕。其風習性情。與內地異。徭役稍急。則怨言而願隨之去。是謂人絕。自兵變以來。誰不爲以遼守遼之說。周巡撫疏主力行而不効。李如楨自請往募而不効。劉國縉以遼募遼而不効。今巡撫雖募鄉兵一萬七千有奇。半多孱弱。每人月食三兩。護如驕子。纔一遣往西寧鎮武設防。而棄甲馬而投河東者。屢屢見報。又生齒絕少。糶民趕車牛且苦無人。而何況兵馬。其不得不徵調於內地者勢也。軍中所需鐵鉛煤炭筋角絲縹竹木。一切物料。以及各色匠役。河西一無所有。至於米豆食物。向來仰給河東。而此路又斷矣。屯田之利。按遼時曾詳言之。此泰平時也。及經略其地。開鐵清撫諸處。豈但近邊不可耕。且皆非我有。金復海蓋之區雖甚完。然河西開鐵避亂者往往依之。但人稠地磧。又重複岡嶺。不似開遼平坦。有可耕之地。見往者且開山而種。何田可屯。而遼陽地土。見爲民種。又未有奪諸

民而與軍屯之理。況是時藩奉與邊對壘。僅六七十里。即檄鎮道每馬隊五匹內撥一軍總領放牧。亦不可得。何況屯田。惟自三岔河以西二百餘里。荒淀可屯。而且無對壘之危。屢屢書咨督餉具題責成撫道行之。而撫道皆以額軍已少不能屯。另募又無人應。若留援軍屯。而每軍歲餉二十金。所出不足償所食費。遂止。蓋按遼時額軍月餉止二錢五分。或三錢四錢。故留屯半以自食。半以佐餉。爲有利。而今且人人食大餉。有月支二兩外者。時固不同也。今三岔河與邊對壘。僅隔一衣帶水。而以西荒淀。又不得屯矣。其不得不轉輸於內地者亦勢也。夫不復全遼斯已耳。如欲復全遼。自不得不借內地徵調轉輸之力。不徵調不轉輸。而欲捐河西之利。專河西之力。以復遼而捍邊。恐韓范再生。黔國復出。亦不敢任。況黔國之於滇。亦是全用中原之兵力。平定其地。而後捐滇之利。以世守之。非先委滇於黔國。聽其自取自守也。光祿何公所上書。慮深見遠。而特以欲置遼陽專守廣寧之說。意圓語滯。爲言者所駁。不知能專守廣寧者。即能全復遼陽也。若沿河設險。扼固內護農田。以培其根本。外伺罅隙。以圖其機會。三五年間。必有一段光景。可見何公之意。正可做而行之耳。初見邊地弗靖。人人齊憤。故議三方齊

進。一完即完。爲不再舉之計。免得零碎遲延。爲費反大。是其設登津兩路者。非真謂東兵能海上來也。謂舟師渡海牽制。俾廣寧一舉成事也。如目下兵餉。必不能應手。而二方之設無用矣。若遂議裁而歸并廣寧一路。爲持久之計。則山海亦可半裁。通計可省兵餉十分之四。而海內亦得以少紓十四之急。豈非審時度力。酌標固本之權衡。但以今日之權勢。揆之。恐決非冲聖所能。獨斷賢相所能。久擔科道所能。靜聽而在外。亦決非。今撫所幹辦。通國欲殺之。孤弼所敢。更端而議也。臥榻亂談。以復明問。伏惟台臺裁示。若經撫不合之故。豈只在不受節制之一言。實是意見作法。有斷斷不能合者。若但不受節制。而苟於事體果能拂而相成。正是大有所合處。雖事事不肯商量而行。而弼尤當謹奉封疆以從。敢有異同於其間哉。更惟台臺諒之不盡。

與周敬松蒙宰汪澄源司農

頃政府有書商確遼事。詳具往復書稿中。今津登兩路。兵餉難措。即勉強區處。有頭無尾。不得如原議以責實功。而徒擔其虛罪。誠不如裁之。移其見完舟於寧遠一帶。爲廣寧近援。而兵日進。兵亦可平過蓋復。以爲牽制。關上仍舊總制率所練三大營防禦。而

原議增兵六萬。亦可盡裁也。非愚自議自裁也。各省以及邊鎮。已是無兵可調可募。有雖欲如議增設而不得者。勢自不得不歸并於一路耳。若裁去一切。專力於此一路。水陸精兵十五萬。或可庶幾。內十二萬置廣寧。爲過河正兵。三萬置寧遠。爲浮海奇兵。河上築三大城。屯兵數萬。護民耕種。自三岔以西。荒淀區畫如井田法。濬溝挑河。一以洩水。一以堵邊。悉招還遼人之避難於山東北直者。屯之。仍各厚給牛種房舍。安插諸費。所獲子粒。不必入官。但徵其草束。而糧多價賤。軍馬自受其惠。屯聚人衆。召募爲兵。西乾亦可漸撤。至於軍駐河上。海糧一帆。徑抵駐所。可省車牛之半。而最便者。尤在窺覷乘便。易於舉動。前此只因兵馬難駐河上。如此調發。從鎮城往河。二百里。須三日可到。比到而奸細已去。河東已早覺矣。別啟謂沿河設險。阨固。內護農田。以培根本。外伺釁隙。以圖機會者。此矣。此等大事。原求急不得。前此撫順之失。三路之敗。皆爲一急字所壞。每到壞時。輒噤口謂三年勿道一戰字。甫得寧緩。又輒催之。今見兵餉難處。有能主持久之說。以紓內地之急者。必相率以爲然。相戒以無相促。未幾而緩師速禍之說。必又紛紛出矣。今人作事之難。類如此。弼亦心知其無敢主行者。聊一私質之於老先生。

前耳。尙祈裁示。以開愚昧。不一。

答王肖乾中丞

河東眞消息。僕實不能得。台下誠得之眞而信之確。卽率師以取海州。亦一機會也。久病初出。得台札袖以闔城。歸而虔誠揲著。得豫之震甚吉。亦使人有見獵生喜之意。但此事重大。不知我將師眞正本領何如。兵馬眞正勇奮何如。今往當用馬兵幾何。步兵幾何。總帥何人。諸將何人。策應何人。進退何以依據。首尾何以照顧。須一一打算停當。星夜密以見示。而台駕或親過河。或止河上。尤須萬分慎重。若大兵何以接應。則僕止帶來二三千人馬。濟得甚事。惟台駕前進一步。則僕亦前那一步。聊張後勁之聲勢而已。不一。

與王肖乾中丞

凡事。信得過。便。信不過。便。止。要做。便。大做。不大做。便。止。要大做。便。不必說。要說。便。止。軍事忌洩。著卦本客俱吉。惟發動爻詞不然爲其鳴也。鳴者洩也。不鳴則吉矣。謹錄以奉覽。夜間審回鄉云。牛莊有衆千餘。海州三千餘。果爾則當以萬餘徑趨海州。而第用

二三千綴牛莊。使不敢出。若取訖牛莊而後取海州。則海所覺而遼陽援未易取也。又須萬餘接應。而河上又須萬餘作老營家當。計車步騎非四五萬人不可。如海州牛莊可一到即下。便當傳檄遼陽。乘虛以復之。蓋遼人兵到即順。自是邊之隱怯處。以其勝乘其怯而邊可走也。今總帥劉忻與高胡牛三道俱行不待言。至其所用兵該幾何。是何營何鎮。其將官前鋒某某。策應某某。老營某某。幸一一以數目姓名密示。僕將一手諭。以軍令申飭之。而至於作法。尤願聞其詳焉。跂望跂望。

與王省乾中丞

來調賀謙。平四知人馬。非爲守右屯也。戰車三百二十輛。半月內俱到。欲將此兵團練一車營。以供台下過河之用也。鄙意再加四十輛。約戰地六十餘丈。通共二百四十五丈。可住騎馬萬數千人。每輛用步兵十二名。四名專供車上火礮之用。八名左右翼車。各持三眼鎗。以佐車礮安放之不及。故需兵如此之多。即餘下千數。俟礮車再至。再擴充之。而毛有倫兵馬旣屬祁帥。則渠無所事。欲令爲車營主將。蓋此時所造礮車二三千輛。可分數大營。俱曾有倫總管。如過河日。悉令此車劄營衝陣。而前日點營薊保所

解各車。俱不中用也。台意以爲何如。只因料濕不得乾。不敢裝成。又打大礮不及耳。若明年三月。而各車俱可完也。

輿閣部科道

廣寧之餉虛冒極矣。上無一定之成規。下有多方之騙局。人倚狐城而難問。事忌鼠器而諱言。諸將有侵冒之尤者。餉司詳中第開營路名色。而不敢直指其姓名。亦苦矣。然嚴核仍須著落該司。責之以無可逃之咎。而後有不敢避之嫌。不復顧之情。庶可望其清楚耳。至於支領掛號。但使分立營頭造冊投鎮。鎮過道。道過司。而弊可立除也。惟是新舊餉之濫加而難繼。有深足憂者。額軍已亡其半。而餉反加至二十餘萬。此其故已不可解。往河東援軍每月概給一兩五錢。今且入第三等。而二敵者一兩八錢。頭敵者二兩。甚有二兩以外者。按冊食糧。何頭敵之多。而上疏論兵。又何象人之衆也。日者簡汰之行。固以討軍實。亦爲省虛費。乃延綏一責備。虢訝爲苛。鄉兵一查退。旋見嗔駁。竟格矣。若此法不行。而人人冒頭敵之餉。日使真正頭敵者。愧與怯懦同。而不知感奮。甚非所以別強弱而示激勵也。若乃餉日加而軍日困。則又在本色之不給。車牛之不備。

矣。假令本色給。而軍不致貴糴。且有贏餘。馬不被奪食。且免倒損。折色不致多放。且有接濟。何至軍需部發。交困若此。今車牛銀兩。地方領到。不知買而第知索餉。賞衛門計。部發到。不知催而第知查餉。米豆爛於海岸。兵馬飢於村屯。錢糧匱於太倉。膏血盡於海內。誠不知其所終矣。故掛號不由道而支領。濟。軍士不簡汰而增加。濫。本色不給。而加餉無益於貧。轉輸不速。而折色終受其窘。故車備而轉輸速。本色放而折色紓。此自然之道也。每欲將此痛論一番。而開口成礙。偶因查虛冒而一及之。小揭伏乞覽裁不盡。

與閣部科道

進兵之事。向以鎮將人馬甲仗糧草件件胸中打透。不過不敢不遲疑自沮。即撫台亦見河上西寧兵將存劄不住。撤退西平。相與議守。無復進意矣。三十日以病愈闔城。忽接其書。言率兵取海州。辭意甚決。蓋因鄭明經之言而又動者也。密令人詢下書者云。撫台明日即往河上。當是時人馬皆發。已是着一商量不得。即還署具誠摺著。得豫之震。其兆吉焉。是以援筆作書。不勸不沮。而第囑以慎重。問以做法。仍遣中軍官往遣指

揮。以便策應。雖身邊帶兵馬不過三四千人。勢未能隨。而亦不敢不步步趨趨。隨撫台而後也。或謂毛弁果以麗兵殺邊茶二千餘。而不能以一卒殺河西通消息。能先期報與兵勿拘寒暑。而不能臨時約日期定策應。此中之故。殊有可疑。然撫台絕不疑。且與各監軍道書曰。即有不利。不過殺傷相當。必不敢復渡河也。以示此身一東。必不復西之意。於是乎始服撫台當機之勇。非弼輩所能彷彿其萬一也。關係進取。不敢不預以密聞。往復書稿并錄台覽。不一。

與王竹乾中丞

凡輕騎襲人者。須大兵向駐河上。相近而玩。一旦出其不意。故能得志。今鎮城距河二百里。自台下發兵東入堡。就草之示出。而遠近已窺其向往矣。奸細滿地。風口一傳。朝發夕到。而我又中道會濟。再候的信。邊必準備已久。未可以輕騎襲也。大倣之法。必三方齊備。然後可。而昨云大倣者。正唯恐輕襲無繼。欲其厚集以往。方可無虞耳。車步并進。是爲大舉。而邊具全應。是爲久持。而邊且急擊。恐與台念初謀未合。仍祈慎重而行。之。祁帥已檄之出矣。聞氣體尙弱。且令毛弁幫之。以備東征之指揮。而後檄調以練車。

營未晚也。僕已至杜家屯矣。併附聞。

回王肖乾中丞

是役也。以毛文龍事。屢經傳報。恐爲異日口實。故欲乘機擾之。是也。不知傳報來自毛弁所否。初高胡兩道。自右屯回至闔陽。卽得台札。決意率兵取海州。頗不以爲宜。今台教謂商之各道。亦以爲宜。旣至鎮武。又有不宜輕進之議。是兩道有二意也。台下當執而問之。旣不能大舉深入。而欲以輕騎夜襲牛莊守馬圈。爲此行作一小結束。有益無益。自有台裁。僕何敢擅奪。况舉事憑鎮。憑道。憑將。憑兵。今劉帥言決不可進。兩道言決不可進。各將言決不可進。一至杜家屯。道遇發回西兵。皆怨言手足凍裂。馬皆跑死。餓死。卽義武鄉兵。亦怨言曰。二十九日發鎮北堡喂馬。初一日調盤山。纔至當日。又調回原堡。及到原堡。初三日又調往鎮武。人摩肩。馬攢足。日夜僵立。冰雪下。無房存札。無鍋煮食。無糧草可關凍餓。咨嗟無復生理。鎮道將皆謂台下不肯憑。而獨憑李鏘等細人之虛報。劉徵等夸獎之誕詞。鏘等必有眞消息。徵等必有眞本領。僕猶未敢遙奪也。若恐有邊。定鎮江而還一意西窺之悔。亦惟台下自奪之。已擬不往鎮武。但候台下爲進。

退而已不盡言。

與王肖乾中丞

過河之役。遼西存亡。宗社安危。係似應計定而行。謀成而動。而臨時遷就。以結小局。果遂足以重創邊謀。不復攻我。否。大振軍威。不復怯戰。否。若猶未也。而且速後。災心竊懼。之。如聞劉徵欲弄伎倆。如前日黃泥窪西人所爲之事。台堡數十人。聞我大兵來。欣然前迎。而忽殺十九顆以獻功。吁可痛也。初一日羅弁亮子溝之報。風聞亦由效周應乾斬獲之故。智惹來。以今觀之。竟亦何益。夫舉事而不能重創其謀。大振我勢者。惟台下慎行之。僕且還矣。

與王肖乾中丞

初四日見台下發諸兵將。及胡道祁將還。但同高道往西平一看。仍還鎮武。已無進兵意矣。昨得台札。又以襲牛莊守馬圈來商。竊意此一偏將軍事耳。且聞台駕初六日欲還鎮武。是以擬還。右屯具咨奉告。頃又聞昨申刻台下令旗鼓。官傳鎮道相累。獨以義勇五營金礪劉式章等。令選精銳數千人。掩襲牛莊。據此則台下又欲義勇獨進矣。經

撫鎮道兵將東行數日。何等風聲。掩襲之法。似是使用不得。而孤軍獨進。大勢所觀。僕未敢晏然西還也。仍駐杜家屯。以伺動靜。謹疾走奉聞。仍以慎重萬全爲祝。卷馬圍東兵已棄去。礮鎗已取來。不俟奪而守之矣。不盡言。

回王肖乾中丞

台駕初二之行。原爲毛弁異域孤軍起念也。而後乃不果。今又欲因邊解嚴而復襲之。自於兵法有合。台下如信得過。即不謀而倏忽趨之。猶恐其遲。蓋大舉明進。分布調度。可容商量。而掩襲乃迅雷不及掩耳之事。古人有行此事。雖同晏會。忽起身潛去。而況謀於百數十里之外乎。惟台下自審而自行之。敬復。

與閣部科道

今日進兵之難。不但弼知之。鎮道將及吏民知之。雖撫院亦知之。而必堅意要進者。非眞謂不戰決不能守也。言三萬可辦邊。言六萬可辦邊。言中秋前後可高枕而聽捷音。若不復遼陽。必無西面稱人之理。言吾用西人可以不戰。戰吾用其叛降。可不煩兵而下。言西人四十萬三十萬四萬一萬來。種種自詡自任。而毫無一驗也。既自以爲恥。而

且見廟堂扶助者多。誇誦者盛。又思有所以副以此。日夜尋思。只圖一決以結此局。及到做不得時。又不得不自河上歎氣而歸耳。前此四進。皆未來商量。及昨次先調發後商量。然彌與其進不與其退也。迨其五退。而中外主戰之窮。見和戰之窮。見地方不能戰之窮。又盡見人有以窺我矣。兵玩而不能。用勢屈而不能收。兵一來而嚮所稱不戰決不能守者。恐反以言戰想戰而不能守矣。撫院第圖悻悻焉一逞以復前言。副衆望而已矣。而抑知後災之可憂。以至此也哉。至於實不能進之狀。小疏僅點破一句。而不便於縷言。恐以爲不肯包護。謂人爲不和。而不言則廟堂不及知。不但票擬覆疏。無所取裁。而且無以解衆多之口。至於甘受衆多之口。而終不敢言。而彌已苦矣。伏惟台臺鑒察。不盡言。

與葉相公

昨接撫院書。謂台臺有揭。深以經撫不和爲憂。彌不知揭爲何語。甚恐懼。而緣不利以爲台臺憂。又甚慚愧。然使可以得和而故相妬擠以爲不和。第用嚴旨一鎮壓之。自不敢不和。而意見作法。不能相強。則威君不能懾。慈父不能諭也。經之所議。撫不肯從。撫

之所爲。經不敢從。撫卽面從經。而語後仍行其已意。經欲面從撫。而事後又防其推人。進慮無成。而以商於經。經若止而遂謂無成爲經許我。退慮無名。而以商於經。經若止而又謂不進爲經沮我。欲兩從則至於兩耽。欲兩違又至於兩忤。若兵將之調度。旣行止以無從。而鎮道之稟承。又笑啼俱不敢。欲從撫則虞獲罪於經。欲從經則虞取嗔於撫。事有不便。而力爭之則以爲媚經。情有所諱。而偶言之則以爲間已。兩釁一開。而人人釁開。皆疑畏不敢言。兩肘一掣。而事事肘掣。皆觀望不敢任。如此而必欲捏合。捏合不能。而經撫俱壞。如此而必務調停。調停不得。而封疆并壞。況水火形迹雖童卒所皆知。而風聲傳聞。豈東人不能得。萬一乘間而抵隙。何以協力而共撐。此尤不可不深慮也。弼以兩勘之後。詬病之餘。覩顏再來。爲名乎。而名已見矣。爲利乎。而利有誓矣。爲官乎。而安於平進。無官不可到矣。祇緣冲聖。哀切一詔。忍禁癡腸。不住。遂大慟。而就道耳。何期一入長安。甫三日。即預經略。應否另設之議。而巡撫之同鄉同年同門。有明不利有經略。而謂當以巡撫兼者。有暗不利有經略。而故留爲本兵者。紛紛出疏。以至今。殆無寧日。今廟堂精神。專注廣寧。案已打破登津。參逐各道。沮壞三方之原議。而獨驅經

略領三四千人於孤城。爲巡撫充一參遊之任。以代其防禦。不審當日主上賜劍賜服。郊餞者。第遣充一路防禦而已乎。抑適中調度三巡撫聯合大舉以圖恢復也。且衆議以巡撫兼經略者。謂其能完恢復大事也。豈其防禦反有所不能。而必使經略領隨帶之孤軍以代之。又何向者厚望撫院之甚。而今量之淺也。竊謂撫院自能辦此。而經略爲無用之物可裁也。語云。人心卽天意。多助之至。天下順之。今自樞部台省以及外之總督。無不與撫同心合意。此和氣之祥。豫順之符也。撫院以慷慨之氣。忠壯之誠。而內獲舉朝之助。外有西人之援。其於成功。自可反掌。如弼則千人所指。無疾而死者也。不裁何爲。或謂裁之則誰幫撫院成功。而不知撫院不容幫。不能幫也。裁之又誰爲撫院擔過。而不知強無罪無辜之人。擔不明不白之過。弼有死不能承也。況事勢到今日。有雖欲不裁而不可得者。何也。經略原議駐劄山海。適中調度。增設登兵五萬。津兵三萬。關兵六萬。以資控制。而備策應。如欲留經略。必須前兵一一如數齊備。而後約期同進。一舉恢復。然後可。今薊保宣大已調盡。延固甘寧已有事。川兵浙楚已語難。雖有到者能幾何。而已一一儘發廣寧矣。關上不敢留。登津不敢截也。再從何處調募。以如經略。

之原議。既不能如原議。便當議裁。而必欲留爲巡撫充一參遊。以代其防禦。此軟困之術也。夫軟困而爲巡撫代防禦。弼之所不恥也。軟困而坐使經撫鎮道將皆乖離而示邊以隙。弼之所大懼也。在今日處此甚容易。以不和斥弼。而仍用巡撫兼經略。關上仍舊總督節制其兵馬。卽以新議三大營充之。則原議山海天津登萊各兵。皆可徑裁。所省糧餉且不貲。而立免海內騷動之虞。又可徐收和祥豫順之效。此雖解紛之權術。而實救時之正論也。望台臺於此一段細思之。若日日調停。日日醞釀。不爲區處。以至於決裂。而朝廷之憂方大耳。每欲將此意詳具一疏。明請裁斥。恐有傷於國體。反復躊躇。不如默爲幹旋之無痕跡也。敢爲封疆冒昧。先奏書於左右。伏惟台臺爲君國力持而早決之。伏書惶恐。

回王霽宇制府

伏承台札勸和。反覆千言。言言動心。字字對症。道義骨肉。不相管者。必不肯爲此言。苟非有胸無心之甚。未有不聞而悚悚感動者。然而不和之故。固未可一二言也。今人只用經不肯和四字。硬坐不佞身上。而不顧其受與不受。夫使撫肯與經和而不與和。經

能與撫和而不與和。謂之經不肯和可也。乃不佞之與撫台也。嘗歃血而共誓矣。嘗披心而商戰守機宜矣。嘗授以哄西方叛弁各方法矣。嘗爲其催兵催餉催器械矣。嘗設法留京營延綏各甲馬器械而濟其急矣。嘗以代題車牛取嫌汰延軍。而得罪同鄉不顧矣。嘗割身邊之監軍道若邢若韓以轉事之。而已獨僕僕射親其勞矣。嘗於永平撫寧山海遍開局造軍礮一應甲仗。以供其戰具矣。嘗一聞進兵。則疾趨出關。疾趨河上。而且以隨帶孤軍代防禦矣。七月二十七到關僅八日。而馳赴廣寧。往回月餘。再駐僅四十五日。而又馳赴右屯。殄冰臥雪。身不帖席。士卒雜處。臂不離鞍。又嘗月月奉鞭策。而任臣僕之役矣。不審遼瀋逼處邊策時。經略曾勞巡撫一顧否。又不審巡撫果兼經略。可再得一經畧來貼奔走否。而五月以來。扶事之殷勤。呼使之勞賤。以照管乎撫台者。亦可憐矣。乃一切軍機邊情戰守防禦事理。或疏言。或書言。或面言。或轉託各道言。而未見撫台有一語之聽。一事之從。不惟不聽從也。而且以疏揭見駁。不惟駁也。而且書揭入長安者一說。與不佞者又一說。併緊關疏揭而亦不知會不投遞也。而且以不救鎮江推。不肯進兵推。坐失機會推。致樞部台省諸公。皆羣起而詆不佞無休時也。此

撫不肯與經和之大概也。若夫經之不能與撫和者。誠自度其見識力量。或三方建置待齊而後進。或厲兵秣馬。治械儲糧。行營坐守。各成家當。然後借西諜旁應而後進。非曰能之。竊庶幾焉。而至於一舉渡河。以不戰而戰。用人勝人。因糧爲糧。此兵家之奇著勝算。不佞心服之。而自恨其見識力量。不能仰佐撫台之下風於萬一。非敢作異於其間也。夫以經之不能和於撫者。而必強其舍所能就所不能。以求和於撫。則不佞不能以撫之不肯和於經者。而必強其舍己成就所不屑以撫和於經。則撫台亦不能非其心之不同也。而兩人做手。各就其見識才力之所及而爲之。實有不能相強者。若夫近來章奏書札。欠於渾融。則亦有故矣。不佞固天地間一實心直性癡漢子也。遇激輒鳴。既不。堪。屈。抑。而。猶。恥。受。人。賈。自。初。推。經。畧。以。至。今。日。何。日。不。破。口。語。自。樞。部。以。及。台。省。諸。公。之。見。憎。者。何。人。不。加。譏。詆。假。使。說。得。事。著。搔。得。癢。着。自。甘。承。服。決。不。肯。效。世。間。轉。喚。支。吾。推。人。以。自。飾。而。今。或。喜。功。起。見。或。同。黨。起。見。或。鋤。異。起。見。其。所。加。皆。冤。枉。而。絕。無。干。涉。糊。塗。而。絕。不。明。白。之。事。而。且。着。着。伏。一。字。可。以。設。穿。於。後。日。不。佞。懼。後。災。不。敢。不。言。言。而。不。得。其。渾。融。者。勢。之。所。激。也。前。撫。台。亦。曾。以。渾。融。見。勸。不。佞。曰。公。雖。不。言。而。

意中欲言者。裏邊有人代爲發揮。吾如不言。誰助吾言。如坐失機會四字。公不過一旬四面八方話頭耳。謂自失可也。謂兵馬甲仗不得到而失亦可也。而猜者必曰此經略失之也。萬一後有差池。而執目前失機會者傳之罪。何以辦之。諸如此類。不一而足。故其不敢不言。言而不得其渾融者。又情之所不獲已也。不然自南勦以來。從牙齒中過話且十年。而今已倦極矣。畏極矣。有何意趣。有何幫助。而好與打成一片者。作冤對敵。鬱鬱苦衷。無可告訴。敢因勸和之台諭。而一披吐之。若一字不真。身死沙場。子孫無贖類。至以拙直之過。不能抑情忍屈。以至於不和。而爲台臺憂。則又不勝其惶悚惴歉。以冀台慈之一諒者也。肅緘申謝。感激之私。書不盡言。

同餉司傳郎中

兵馬錢糧。是經略所得而問者。支放既已冒濫如此。門下不言。不佞不知斯已耳。既言之。而不具詳。請查。是門下溺職也。既知之。而聽門下護惜。情面保功名。相爲欺罔。是不佞負朝廷。負海內。窮百姓也。而撫院以爲用意甚深。豈必縱奸弁侵隱而後可耶。逼之始言。所不盡言者。想更多也。小疏中原無此語。乃其意則有之。其怒而促詳者。見門下

畏撫如虎。一味推辭。只云不敢詳。不敢詳。而不佞激於清楚錢糧之一念。不覺怒其護惜情面。保功名。而不顧朝廷。遂有白簡從事之說耳。棍將冒錢糧與撫院何預。而何疑之深也。往齊餉司不爲撫院所喜。竟不待滿而使之去。計門下今日亦齊君之續矣。然須撫院劾之。而不佞不便以白簡從事。代爲驅除也。此復不一。

回王宵乾中丞

向者屢議上門索戰。今東兵來戰於境內。以主待客。以逸待勞。折衝制勝。在此舉矣。軍前機宜。已有台約在。僕惟遵將士退回盡殺之約。出牌申飭。然台下自得便宜從事。亦無須此爲也。義州戚家堡已遵命如數撥戍而往矣。此復不一。

回方孩未監院

廣寧馬步。盡數東驅。爲禦邊來乎。爲過河進戰乎。爲過河也。則東兵已大集海州不可往矣。爲禦其來也。則我兵已先疲二百里之遠。日夜冰雪之困。而東兵從東昌來。不過二十里。恐迎頭不能當其新銳也。若爲止作聲勢以嚇其不來。則又未有盡家當搬出作聲勢之理。標下止有八千人。作八箇頭子。初欲四五千往杜家屯迤東防援。繼見關

陽一帶。人馬盡調盤山。而鎮城之右。如人竟無一手。而鼎竟無一足。又不得不將所發者。仍留關陽一塊。以成一師。而作廣寧之犄角。壯窺關之要阨耳。其果聚衆入攻。不宜往迎見短。只宜虛二百冰雪之地。誘入廣寧。而兵行三日之遠。受三晝夜之凍苦。必不敢入也。奈何改兩路犄角之形。作一條竹節之事。而先空鎮城。使人心驚亂。則不佞之所未知也。私以質之高明。如何如何。

回劉總兵渠

軍前機宜。撫台已有約不與聞。承教感甚。細閱撫台來劄語意。不過借此爲名。揚兵於南。使西之二三千人。合我兵千人。北向黃泥窪攬空一番。以了用人之局耳。撫劄謂邊大舉深入。我勢薄力分。不知所守。是既怕其來矣。而又遣周羅諸將分番過河以誘之。寧非請其來乎。是既不知所守矣。而又割江步於西平南杜車於江營南。則從此而南百餘里。不更薄而分乎。西人久聞懸兵來。故聚精兵於黃泥窪一帶以待之。今量此二三千瘦馬。幹得甚事。而已知我無西人之靠。其一意西圖廣寧。真有不可知者。即謂海州牛莊有兵而弱。而以當我敗氣未復之餘。過河誘之。幸貴鎮與撫台好爲之。高元圃

久無一字論此事。豈知日來紛紛調遣。欲爲用人結局。而不洩以取罪耶。此啓可同渠觀之。河東事仍希不時見報爲祝。此復不盡。

回高監軍道

自過歲來。日聞廣寧紛紛持白牌沿街督馬步兵東出。私謂撫必入攻。亦欲整師而東。及候數日。却無一消息。忽得劉鎮守以撫筭呈。稟細閱之。而始悟塘報爲做成圈套也。西人雖來萬餘。然戰兵不滿三千。無食無草。跣踐關口已極。而不使發回。欲令獨往黃泥窪攬一空。以結川人之局。而西兵少不敢往。故旣以我兵二三千助之。又悉鎮城兵揚聲三岔河以綴邊。徒使西人得利。西人得利而用人效矣。此其本情也。曾以此回示劉鎮。仍語邢韓兩道。以已意一問真消息。及持年兄與胡道回書來閱。果被愚見參破。而撫院回書。則不惟匿其本情。且謂是鎮守及高年兄之書告急。催各營兵催車兵催西兵。惟恐不足。此蓋悚於經台前日之檄。東兵過鎮武一步。道鎮皆斬之說也。但與兩道大發一笑耳。夫以催發各兵。爲出於經略之檄。又以遣將過河誘致邊兵。爲出於經略誘之使來之勝算。不知小疏誘之之說。是如此做法否。萬一不濟。又將歸過於經略。

身上。而弟更畏之之甚矣。原割抄附覽。

回王肖乾中丞

凡性直理直之人。不堪困屈。今困屈久矣。不發狂大呼。蹈跋扈之罪。則忍吞憤懣。有性命之憂。過歲以來。氣成中滿症候。日僅食粥二盞。此那韓兩道所知。而日日憐慰者。台下必欲見困。所謂我雖不殺伯仁。伯仁由我而死。台下忍乎哉。台下必欲見困。何負於朝廷。何負於封疆。何負於台下者。而橫被舉朝所詬誶。一至此。今欲講地方事情。則謂人妬成。欲辦不和道理。則謂人使氣。中外橫心昧理。打成一片。不使人開口一句。僕已願吞聲負屈而去。以全君子絕交不出惡聲之義。台下何迫人之甚也。今以性命託台下。以道義望台下。故復草草若此。惟台下憐我。釋我。寬我。毋困我。

與王霽宇制府

本月十五日。得高監軍道稟報。東兵的於十七日過河。時右屯僅團湊萬騎。當發右哨五千付祁鎮高道統領防禦。二十日。弼親自東行。欲觀河上動靜。行至石橋。據羅萬言周守廉各報。東兵於本月已時過河。弼一面東趨。一面傳韓監軍道星夜督發左哨五

千騎戰車四百輛前來鎮武。及至板橋。據撥夜報河上兵馬已敗。周守廉奔平堡。堡門已閉。滾出濠外。復奔鎮武。羅萬言南奔黃家圈子。亦歸鎮武。時祁鎮與胡監軍道在杜家屯。防柳河南路。彌亟催該鎮率領別鎮魯之由等夜赴鎮武。與劉渠合營。又亟持令旗白牌督各鎮將與高道救援西平。據高道附差官口稟如此。兵將鎮武不可知。廣寧要緊。今城內人民大哭。更怕西人有變。請彌切勿束。當以急救廣寧爲主。而是時續調前左哨及車營人馬。已至石橋近閻陽地方矣。韓道并胡監軍道俱連夜趨板橋。向彌晉廣寧標軍已盡東發。鎮武馬步已踰四萬。前兵當駐閻陽。以援廣寧。而防西人。况原議鎮武閻陽分南北兩路。與廣寧犄角。今祁鎮南路人馬盡併北路。而廣寧右臂已斷。更爲可慮。彌從之。因而暫至閻陽。纔至而所遣左屯守禦安邦與聽用守備蔣應暘等來報大兵敗矣。問其詳則二十一日。劉鎮分大兵爲十個頭子。遇東兵於平陽橋方。一對砍。兵卽奔潰。勢如山崩。鎮道各官。俱不知下落。亟令韓胡兩道與隨行將官。將前兵五千。劉營以待。而軍少勢孤。望見殘兵遍野。喊逃而西。人人思潰。不得已多方勸諭。其心暫安。而其後將有不可知者。事勢至此。惟有仰天長歎耳。望台臺一面急急催兵部

發兵守關。以顧京師。此萬萬一刻不可緩者也。急切急切。

回王肖乾中丞

今日之事。惟有痛哭而已。手下僅兵五千。見逃兵紛紛而西。一夜數驚。聞廣寧皆譁而欲走。不得已。令道將溫慰以安之。衆惡之身。自分必死。廣寧一塊土。惟台下勉守。不一。

與王霽宇制府

今番逃兵。與前番逃兵不同。前番逃兵。皆赤手徒步。饑餒摧困之極。易於制禦。今次逃兵。皆持刀騎馬。過路殺人。肆行無顧。若不亟放入關。必激他變。况前番河東雖失。而河西尙存。阻回防禦。自屬撫院。今撫院已棄城而西。阻之關外。欲爲誰用。如聞撫院欲往寧前。招回防禦。作山海藩籬。固是一見。台臺試看此輩已到關者。肯回寧前否。肯爲撫院用否。此一節台臺須萬分酌量。卽已入關者。萬萬不可再留。斷送山海。但遣回亦當有法。須某鎮某省。各歸各項。部分停當。擇立頭領。送回原籍。除逃陣者外。其城守及續到土川浙毛各兵。俱係無罪之人。當留守關城。卽年當還者。仍應稍資路費。免沿途騷擾生變。至於遼人。應盡數入關。彌罪過已極。若殿後保得十餘萬生靈。亦足稍禳。况係

朝廷二百六十餘年愛養赤子。豈可令其望關而返。仍爲邊有。此亦冲聖仁慈所不忍聞也。惟台臺亟與莫主政商量施行。幸甚。

與長安公書

鎮武之兵。不戰而先奔。問誰先奔。則憤欲拒戰之鄉兵。摩拳擦掌之將兵。孫得功黃進。祖天壽金礪等也。廣寧之民不守而先潰。問誰先潰。則言守之生員。門下之員役。與謀獻巡撫之孫得功黃進等也。二十三日。巡撫見不肖於大凌河。曰。二十一日夜報兵敗。二十二日督兵士上城不應。督百姓上城不應。一起生員進見。有半言該守者曰。父子兄弟。各顧身命。何不可守。有半言不可守者。曰。人心事勢。已至於此。何可守。彼此辨駁不已。時吾猶以言守者爲是。不可守者爲非。及出衙門。而言守者已被人毆打。及吾出城門。而凡言不可守者。皆保家眷出奔。言可守者皆持刀執棍。堵門殺人。後然悟言守諸生。意在羈留而欲有所爲也。今孫得功黃進已擺龍亭。差官生去迎東兵。傳呼滿城荆頭矣。此兩人者召募鄉兵。每言當過河戰。吾信之。兵敗歸城外。城中內應者曰。非孫黃兩人進城不可。或謂此兩人者在城外不敢進。吾亟召進與見。猶欲停任之。及出衙

門。卽發礮堵城門。封銀庫。封火藥。以待之。時門下人已散盡。而吾猶不知也。忽江朝棟直入內衙。挾吾出。廐馬駱橐。已多被牽去。直餘兩駝載四箱自隨。及抵城門。而城門刀棍堵截如林。僅以身免。身旁一相伴朋友。已劈頭打傷。駝箱已被打奪。若早放孫黃兩人進城半個時辰。而吾今日不得見公矣。不肖聞其言而哀之。巡撫每向監院各道述李永芳對謀者曰。我急要反。恐其害我全家性命。只待進兵時裡應外合方妙。但西兵好逃。切不可用。如朱萬良領萬騎。見東兵數百便走。東還怕我遼兵。王都爺只用遼兵。待臨陣時正兵向前。奇兵出後。我以自標爲號。從後殺將去。東必大敗。便可立復遼陽。那時有庫銀八十萬。奉獻王都爺。可贖我罪。所以巡撫蚩蚩。只想此一着。今日着一人過河。明日遣一人過河。只說遼兵好。西兵不好。以致西兵西將。人人憤怨不平。所以前日上陣。俱是鄉兵標兵在頭敵。孫得功等故意上前一衝。卽往旁卸走。因而各營俱起。以至大敗。是王撫九個月所做之工夫。全爲李永芳做完。而平日所稱爲摩拳擦掌者。適爲謀獻巡撫之地耳。乃事急時却到處傳書寄語。謂經略衙門官舍孟承勳王朝裕等過河請東兵來。則其愚而可哀又甚矣。孟承勳開原通使也。李成梁使誘北關逞家

奴養家奴。撫賞於開原城下。殺其千人。得授指揮。又有宋文鑑者浙人也。其父爲成梁書記。文鑑生長於李氏門人。得官參將。前楊經略以文鑑爲中軍。承勳爲旗鼓。及不肖至遼數日。借事責承勳四十板。逐之。於文鑑則參革之。舍人王朝裕府州緝訪。則袁經略之所收也。遼陽陷。皆奔至廣寧。巡撫皆收之。每日給廩給銀三兩。及不肖到關。巡撫用印咨送來。且開朝裕爲舍人頭。今咨與手本俱在也。顧承勳終畏不肖不敢來。朝裕雖一見而察其爲積犯。亦聽回廣寧。不復用。是否奸細。亦巡撫之所收所送。而不肖未用也。不肖嘗對監院各道。謂巡撫喜說謊。謊到多處。并自家書咨亦記不得。且不但自善謊。而又善替西人與李永芳等說謊。旣得通國諸公爲之圓謊。而又往往德不肖以推其謊。若一一舉巡撫從前之疏。揭以實之。當令通國絕倒。又令通國羞倒。而不肖且不欲言不敢言也。方作書訖。有客從都中來者。謂通國先有一種論曰。西人只因經略不喜用之故不來。及其來又有一種論曰。經畧查點西人皆不服。噫此其謊之一端也。去年十二月內見塘報。西人以二萬來助。不肖欲得其實而商量用之。亟遣右屯守備安邦往關口問王牧民劉世勳的數。世勳不敢隱。隨揭稱西人到有萬餘。有甲馬者約

三千。無甲與綿甲者約二三千。其餘俱是討賞。及牽馱乾糧部落。此揭想亦報之巡撫。而是時監院亦差周守備往問。非獨不肯問也。何曾查點。何曾不服。棄城之日。西人尙在關口。尙有哪嘛僧來講話。尙遣萬同知賞送萬金及其賞段無算以買之。而竟不可用。豈以查點之故。而不爲用耶。不肖於兩日前曾對各道曰。撫台事事見推。惟西人一事。斷推不上。邢監軍道曰。只恐也要推上。今果推上矣。敢因是而并及之。統惟台慈裁照。不宣。

與閣部

弼初奉旨駐劄關上。控制三方。繼奉旨巡撫督兵出征。經略控扼山海。後奉旨出關策應。今三方之議。久被廟堂諸公破壞。山海控扼。幸亦無恙。即出關策應。而經略標下。方於臘月間團湊萬騎。東兵未過河。而已先發五千騎東援鎮武。東兵方過河。而弼已先離右屯。東行至石橋。始聞報發五千騎及礮車四百輛。親領至閭陽。北援廣寧。比至而廣寧城已棄矣。弼只有結隊徐行。護民西還一策耳。身爲經略。使國家二百數十年疆土。自吾身而失之。敢不以身爲朝廷受法。况近年邊事。國事。只緣人臣規避。苟免不肯。

受法。所以人人不知。警畏。外務說謊。以欺君。內務扶同。以誤國。旁務乘機。以報怨。不捫良心。不顧公論。不畏國憲。一任仇毒。陷害而卒。以淪棄封疆。扼宗社之禍。獨歸於沖聖。亦可痛之甚矣。今日之法。請先從弼始。使後來邊臣。知畏而不敢。輕棄所守。廷臣知畏而不敢。亂撓人事。則山海關。其尚有死守之人。哉。惟閣下主持幸甚。

與內閣

遼撫之必斷送河西也。雖三尺之童皆知之。然一時舉朝。皆誇詡其功能。弼但一言及便。以爲妬而欲害其成。記去年十一月初六日。方監院會於右屯衛。談遼撫只聽西之間諜。與孫弁之哄。不肯收拾兵馬。戰守諸狀。至中夜。因而歎曰。王肖乾不換。必斷送此一塊土。孺這一副骨頭。不知交何所。不如老師一手拏來做罷。弼曰。此一時所稱爲大功臣也。見在人家參我妬忌。若我在此換了他去。人必以我逐害功臣。而置我於死。不如使我先去。然後換他去。默默易置。使地方與巡撫。皆得兩全而後可。監院曰。人方恨老師。誰肯放你去。方誇肖乾以爲必能恢復。誰肯舍他去。弼曰。公爲監軍。不妨明白一疏。換他亦可。監軍曰。同年情分。况前日用爲巡撫。出孺等意。部覆亦引孺疏爲首。何好

就說換他。因躊躇許久。曰：他只要過河。不如聽他。弄下事來換之。人自無辭。弼搖手曰：此事如何試得。遂歛歔而止。今監院可問也。地方情形。裡面既大家撐定。不容弼一開口。自不得不懼禍求去。又不肯放去。而又不可以節制。不與以兵馬。只是要人空空挑此禍擔。而今果爲人挑矣。然其如封疆何。守關之事。自揣愚鈍。不後于時賢。而言者味心橫口。必欲逮治然後已。與其終不免於一逮。不如早逮。使漚督早得專一而從事之爲念也。伏惟相公裁察幸甚。

與閣部

署部公見弼塘報已數日。而猶主巡撫尙在廣寧寧前之說。以蒙冲聖而混朝紳。機關亦巧甚矣。然天下事終須歸到實處。徒多此一番轉折。而心勞日拙耳。頃偶在一客座。傳署部公所擬查參一稿。頗見推敲。而於巡撫并不忍加以一字。但云若其覲顏入關。罪應并論而已。意蓋曰：如未入關。可以無論。而先入關者罪無赦也。信如公等處置。而亟亟憤爭之氣。運筆寧有消磨時耶。情知今日欲借無可苛求之經。以爲遮蓋逃撫之地。然既要於撫有曲貸。自不得於經有厚德。而於其論撫者有重罰。今舍撫而論經逮。

斬。舍言撫見在廣寧之說。謊者。而反以論棄城逃者爲妄言。爲結黨。朝廷之處法如此。彌能逃於今日諸公之手。山海京師。又能逃於今日諸公之手乎哉。言此血淚逆流矣。小揭呈覽。

與葉相公

前日王五傳相公意。著令用心守關。又傳著令出關不出。則於法無貸。吾再不能救護等語。是守關出關。無非開我以生路。豈不感激泣下。顧又思之。下有寃狀而不得伸。則人思感奮以圖報。上有明法而不混。則下得憑恃以自安。今遼東敗亡。全在玩戰而不修戰具。惡守而不設守備。用人用謀。而不聽經略鎮道之言。信遼將遼兵。而疾視西將西兵。以墮叛將怕遼兵之說。非繇經撫之不和也。封疆存亡攸係。經略功罪相關。眼見其事事皆誤。着着皆虛。言言皆謊。之必至於敗。忍默默而坐視其斃乎。自不得不忠告而善道之。忠告善道而不聽。又不得不出疏出揭。請朝廷主持。而責成之。朝廷之上。不主持。不責成。而反獎成其誤。誇翊其虛。圓成其謊。以沮弼諷弼之不休。又不得不動色而力爭也。是其不和而爭也。非以私仇小忿爭。而以戰守爭。以遼之存亡爭也。爭之不

勝。以至有今日。正唯恨前日爭之不力耳。若以爭戰守而爲罪。是必與撫一鼻出氣。亦如樞部台省諸公。皆稱其勇於進戰。妙於用虛。善於用間。用謀用兵。而深得夫河西人心也。然後可。竊恐事到今日。必又另有一番正論。以責經而寬撫者。弼且寧甘不和之罪。而不敢甘扶同誤國之罪矣。至於兵馬是其專掌。城池是其駐劄。不肯實實做事。是有心慵意懶。請旨責成。及戰事收拾難遲之諸疏在。是否推諉。經有經事。撫有撫事。弼亦未敢混承也。且夫今日之責弼守關。而又改守以出關也。將真以關上非弼不可。而專付之以封疆之重乎。抑如人言慮遠。撫入關必遠。故借外護名色。以安頓之。而拉經以爲蓋撫之地乎。如拉經以蓋撫。則今日已受其冤累。何敢再爲所累。如真付以封疆重事也。朝廷便當爲弼別白一語。以伸其情而明其罪。使已罪之猶可贖也。而免強立功以贖之。若混於不可贖之罪。而強以不能贖之事。以圖苟免於一時。則早遠遲速。明死混死。終不免於遠且死耳。況朝廷之正法。未有如此大事。而不遠疆吏。問中樞以正其罪者。不但於國家之常憲無光。而亦於相公之大業有累。此又弼之所以效忠於相公。而不自知其罪者也。惟深思鄙言。無以拂而過於訶責。以緩弼一日之死。惶恐惶

恐。

與關部科道

初議守關。再議出關。非從關起念也。慮遼撫入關必逮。借外護名色於關外以安頓之。而謬謂弼留一上路。不知我路未死。何煩留生。若出關而前有謊撫。後有讐樞。與亂同道。與敗同盡。此正所謂死路也。頃出關之信一聞。而關上軍民。洶洶包裹欲逃。制台忙甚。出牌曉諭。題留經略。無得驚惶。於是始上出關十不可之疏。復用西人爲謊撫。同一安頓法。而中外之所以爲該撫者。良工心苦矣。痛念冲聖孤立於上。羣情蒙蔽於下。誰是分猷。誰爲共念。弼受厚恩未能報。自不忍不爲主上任守關之事。而鑒往揆今。則又斷斷乎有未可者。夫三路債而亟欲其來。遼藩固而亟逐其去。此前事也。即昨年四月奉召以後。是時人情唯恐不來京。及到京唯恐不駐關。及到關唯恐不出關。既出關又惟恐一入關。初聞兵敗時。惟恐不回關。及回關又惟恐不逮斬。乃日者守關之旨纔出。而出關之旨又繼之。愚弄若此。其誰敢任。生平作事。全憑一點烈心火性。今折磨已盡。無復人理。惟有求速一策耳。論世情當無生法。論公道當無死法。即爲封疆受法而死。

死有餘嫌。又安用冤枉以生。而再受羣公之愚弄。直弄到死而後已乎。鄙志決矣。伏惟台慈矜察。幸甚。

與閣部

初聞過慮者。謂弼素得人心。而性又不受屈。恐激而有他也。當先奪其兵柄。是以有先勤而徐圖再逮之說。弼懼焉。十八日。巡撫行諸公皆贖。撫行弼不得不行。而軍民皆視弼爲去留。又不敢明白行。使軍民遽失恃。而重過慮者憂。又不得不於深夜潛行。策蹇顧脚力以行。蒙疑蒙難。一至於此。而弼亦自傷之極矣。顧猶未敢回籍。恐捕逮於數千里外。驚死妻孥。欲於前途再具認死一疏。請住近地候處。而又不知其如何也。奇冤奇苦。惟憐察幸甚。

與內閣

頃見何僕少經撫定案一揭。又得張鶴鳴移當事者書一道。撫而歎息曰。僕少輕險躁妄。無足怪。獨本兵以意見之闇疾。業已扶同誤國。至於此。而恐弼回關。又將在關相見時。已發一縷之良心。死味淨盡。可弔也。謹將兩人相會時語意光景。略述其概。僕少初

至關相會。及十八日夜。攜檯篋行時。促膝談廟堂二三大老秘事。有不可以語人者。真其揭所謂好同年也。每慰弼曰。向來裡面不知外面事情。今小弟到此。方知老公祖虧苦。方知王巡撫一片虛謊無用。連日會張鳳老。甚服老公祖。甚悔過信王肖乾言。弼曰。既知悔。便當爲封疆說一番。以見老臣公忠體國虛平處物之意。僕少曰。他爲人偏執。如何肯做。小弟昨已有疏去了。弼曰。疏如何說。僕少曰。我責備裏面諸公。將黨護悞國邪臣心腸。盡行收拾。是說他那邊人的。弼知其爲騎牆語。問曰。只恐裡邊看不出來。僕少曰。我這邊人自然看得出來。且我已有一大長篇書字。與徐南臯。爲老公祖說得極詳。弼感之。忽聞內議欲弼回關。消息忙忙。復出此揭。此其意固不難見也。本兵初到關時。部道先見者已將地方情形講過。及同王軍門往拜。察其意色甚慚悔。弼虛心平氣。將河西事憑軍門略說一遍。本兵惟自言其悞。歎氣而已。及回拜時。弼出平日往來書札與之看。看到王撫手書。言進兵虛聲處。曰。他與我書說實實要進。誰知與老公祖書又如此說。看到弼與撫院書。苦心商議處。又曰。我只道老公祖不肯與他商議。誰知事苦。苦心商量如此。因將前後事再叙一番。無言可對。但慚悔曰。是治生過信了他。治生

本意要急成此功。見他說得這等容易。故深信了他。誰知却是虛話。是這個無用的人。當時老公祖果不明白參子他。免有今日。弼曰。一時誇爲大功臣。纔一點綴。便惹下本衙門與科道多少參論。若當時參了他。我這顆頭早被諸公取去。本兵默默無言。惟歎治生悞國之罪。不可贖了。弼遂信本兵爲直肚腸人。開心見誠。與之無所不言。每會言必談兩個時分。謂此老胸中已豁然。今其書仍謂去年七八九月遼撫欲進兵。經略勅道將言戰者斬。不知面晤一段說話。竟放在何處。又謂弼從海洋往邊上去。弼門下官傳守口兵將云。東兵百萬一來。關必不守。你們守此口何用。不如散去。此豈人說的話。恐惟本兵情願。以斷送河西快忿者。能爲此言。而門下官不能爲此言也。至謂關上百姓皆痛恨弼。一聞熊爺奉旨回關。一國之人。皇皇如在春冰。嗚呼。督臣相對痛哭。云國家事不可爲矣。及晚見新推有人。而人心始定。云云。更覺可笑之甚。夫關上百姓之哭。怨與否。痛恨與否。弼俱不必言。但督臣曾因關民懇留。有疏留弼守關矣。又見關民驚惶。曾有告示。言已題留經略。曲爲安慰矣。似又以留弼而國家事尙可爲者。何遽哭之痛也。二十八日。又得督臣書。稱大疏與小疏俱奉旨部議。仍借台臺儼臨。聖主自爲宗

社封疆計。卽沛溫綸矣。願言返旆榆關。彈壓收拾。以慰輿情是望。又何與本兵相對痛哭之說。何大相反也。夫本兵騎虎不得下。本欲弼與遼撫并逮。卽回籍聽勘。已非其願。若弼一回關。而已之勢處其貧。罪有不可脫者。此書之出。勢所必至。獨歎七十餘歲一老翁。反覆傾危。作此一段惡少之行逕。使痴心直腸者遂信爲眞。而與之披肝露肺無慙。亦自傷之極矣。伏惟台慈炤鑒不一。



三名臣書牘廣告


近世名臣無出曾胡左三公右者三公皆能文章胡文忠嘗言今世作奏只有三把手其一自謂餘二人謂曾左也其自負如此三公奏議固美然不如書牘爲尤高蓋奏章拘於律令往往不能盡言而書牘則曲盡事理且無支辭也三公之文各有所長文正樸實淵懿上逼西京文忠沈摯周密方駕江陵文襄雄姿浩氣逾於同甫經世大文曠觀止矣但原書過於浩繁書牘特其中一種間有尋常案牘酬應率筆雜於其中讀者每苦尋求之費力茲特擷其精要都爲一編約二十餘萬言舉凡兵機之得失制度之變遷近代之軼聞賢豪之志事皆一一可考焉誠中國政治家不可不讀之書也

每部四冊定價洋兩元

發行所廣智書局謹啓

光緒三十四年五月十五印行

定價大洋二角五分



校證者 廣智書局社員

印刷所 上海西門外梅林山路匯元里 廣智書局活版部

發行所 上海英界四馬路 廣智書局

寄售處 各省大書莊

(熊秉啓書牘全一冊)

82

21211